

Tohuatti ebreo cajimanajaridenidsa ima teppe dosse inaridsajaro

Hebreos

Jodiodenipa Isaraeri potemahi. Poccadeni ididenipa Abarahao, Isahaca, Jacobo quinajarideni. Pohnuadeni atti oninipi ebreo. Pohnuadenidsa naco: ebreodeni, quiquinanajari.

Ajjaro ima dsodode onipa ssamo inani. Dio Atti nahatoqqiri najarideni attidenipa: Pabljone jeranitide, quinajari. Jodiodeni Jesodsa jehe quinajarideni nanajidso toquejenadsa Jeso inebomanabote nadsa ajjaro ima dsododepa pohnuadenidsa dsodo inajaro. Jeso inebomana-jarahijine dsodo inajaro. Ima onihipi: Moisesicca marinaja ia tonassiaja-baqquinijine pajira-jerani. Jesocristodsa pajissa inajarona denima bica tajaro. Najaro-dsana icassiejeranijine pajirani, najari pocca dsodonijidsa.

Maittaccadsama jodiodenipa poccadeni imasiri manaconi tojahijine bani bedi bicahi inanadsoqqe-manadsa emene Diodsa da da quiquinanajari. Najaro bani bedi emene dada Jesocristojine nebojaro jodiodeni mitta-manahissa tahijine pohnuadenidsa dsodo inajaro.

Diopa iadsa huati tahijine Pohua Bedi dosse inaronajari

1 ¹Maittaccadsama Diopa Pohua Atti cacomeraqqiri najaridenidsana huati tadsa najaridenina icca ididenidsa huati huati ihiquimamana najaro. Diopa pocca dosseniji, madija pohnuadeni tedsejemacca ima ahuato inajaropi onihini onihini inajararo. Naraha Pohua Attidsa huati tahi ojari-jerani. Pohua Atti cacomeraqqiri najaridenicca huadadsa naqui ahuato inajararo, bodideni naco inahattabaqqijari. ²Naraha jidapana dsama jicanicca tohuajiradsa iadsa huati tahijinepa Pohua Bedi dosse inaronajaride.

Najarina iadsa Imehi Atti huati huati ihiquima najarode. Jehe, Pohua Bedipa tahide Imehi tedseje meme, nami, huapima aniridsajaricca inahatomanapojari. Nadsama Diopa Pohua Bedina cacahuade inajarari. Huapima jinede tojajari-paja. ³Jehe, najari *Dio Bedijinena Imehi Diocca dacorehe, deni tojehe, canahatori canehe iadsa ahuato tajaro. Pohnuapa pina Imehi Diossa najari. Nahato tajari. Bica tajari. Meme, nami, huapima aniridsajaricca pohnuatti dadorajarodsas: –Anidsanapona –nadsa pohnuajine anidsanapojari. Nadsama itohui dsoqqehijine ibora tadsapa pohnu emenejine ibodicca imasiri

sse naridsadsa ibodi tohuirejaro.
Dsotode Diojine deni tojadsapa
memehuaji toccamacossanidsa
Dio Bicabote inori nahatonihuaji
huittarijari.

**Diojine Pohua Bedi deni
tojadsapa Diocca dodosse
tabaqqui memehuajicca
ajamani toquejenajari**

⁴Jehe, Dio Bedi Imehi inorihuaji
huittarijaripa *Diocca dodosse
tabaqqui memehuajiccadsa deni
tojajari. Najarossa najaro Dio Pohua
Bedi oni icanacanjariipa pocca
dodosse tabaqqui onidenidsa deni
tojajaro. ⁵¿Diopa pocca dodosse
tabaqquideni ojariadsa ajama
najarico?

–Tiapi occa Ejedeni tijani.

Jidapana Ohuapi ticca Abi ojani

–¿najarittaco?

Nohuerahi. Pohua Bedidsana nama
najari nade.

Pohua Atti pocca dodossedsa:

–Ohuapi pocca Abi ojanitohui.

Pohua naco occa Ejedeni tojahi-
tohui –¿najarittaco?

Nohuerahi. Pohua Bedi tahimari
huati tapodsana nama nahi nade
Abi Dio.

⁶Pocca Ejedeni tahidecca pina
madija iassa naha tossohahijine
iahuaji dosse inaronajari. Nadsapa
Pohua Attipa:

–Occa dodosse tabaqqui huapi-
mapa occa Ejedenidsa: “Deni
tijani” quinana.

Pohuadsana huahuatidsemana
nana, onajaro –nahi nade
Dio.

⁷Diopa pocca dodosse tabaqqui
tahimarideni huati tadsa naco
Pohua Attipa:

–Occa dodosse tabaqqui
pina jojode dacorajarossa,
pina jororoni ppocorajarossa
onanaridsabaqquijari –nahi
nade Dio.

⁸Naraha Pohua Bedi tahimari huati
tadsapa:

–Tiapi Dio tijani. Ticca caca-
huehe nema dsanaponitohui.
Ticca cacahuehepi dacorajaro,
pajiranissa dsanaponitohui.

⁹Ima bicani, pajiranissa tanicca
tohuinira tajaro.

Ima tabaccora taniccadsa jipera
tinajaro.

Nema tajaropi Ohuapi ticca Abi
Dio tia ocattejidsajaro, tamine
tijanjine.

Titessedenidsa tia deni onana-
jaro.

Tiadsara huatidsehe deni
tojanicca onanajaro –nahi
nade Dio.

¹⁰Pohua Bedi tahimari denima
huati tadsa naco ajama najari:

–Jehe ohua Medsede, tiapi
ajjaro dsama nohueracca-
dsama timadipojaro.

Tiana nami tinahato, meme
tinahato najarode.

¹¹Nidsa najaropi huapima jica-
ridsanitohui. Naraha tiana
timadi-dsanaponitohui.

Aja tinahatoridsajari huapimapa
pina etero jadani tocajadsa
tojorarajarossa nahitohui.

¹²Nadsapi domo taqquininitohui,
pina etero jadani domo
taqquinijarossa nanitohui.

Pina etero jadani inebodsa
onihira edsajarossa najaro.

Najarossa nanitohui aji
tinahatoridsajari huapimapa
cacajiquimerahitohui.

Naraha tiana nema tidsanapotonitohui. Jadahi ticajajeranitohui –nahi nade Dio.

¹³Diopa pocca dodosse tabaqquideni ojariadsa naco: –Deni tijani –¿najarittaco? Nohuerahi. Naraha Pohua Bedidsana Atti ajama najari: –Ohuinori nahatonihuaji tittariji. Ohua tedsejepi tohuatti dacorajaro ticajiji.

Nidsaranibote tia huadide-denipa ajamani onanabaqquihitohui. Poccadeni dacorehepi onajicanitohui –nahi nade Dio.

¹⁴Aja, pocca dodosse tabaqquiquipa assiredeni qqui inabaqqui-jarahi. Pina madija iassa quina-jarahi. Dio pocca madija tocassiejerarideni acco camadedeni ahuaji dosse, ahuaji dosse ihinaridsabaqqui najari. Najaridenipa bicaqquri naraha ajamani toquejenajari. Dio Pohua Bedina deni tojajari, onajaro. Epejeni.

**Diocca dosseniji dsati
icassiejeranijinecca
eti ajima-jerana**

2 ¹Jehe, Dio Bedipa Imehicca dodosse tabaqquidenidsa deni tojajari. Nema nadsapi marinaja pajissacca imittapojaro eti ajimajerana, onajaro. Najaro eti ajimadsapi pina Diocca jahui bicani inebodsa pajimaranihuaji huere inajarossa inarana. ¡Paji! Nema inejerana. ²Maittaccadsama Dio pocca dodosse tabaqqui memehuaicca inahattabaqquidsana *Moisesidsa huati toqquimamanajari. Najaro Diocca dosseniji pajissaccapi dacorehe cajini. Madija najarodsa iboqquri nadsa tabaccorehe

inanamanadsapi Dio inajidso-baqquijari. ³Jidapapi Diocca dosseniji dsati icassiejeranijinecca iadsa anini. Najaropi denima bica tajaro. Naraha najaro ettajodsapi Diocca najidsohue ¿dsori inapadseje? ¡Dsori inejeranitohui! Ia Medsede pohuana tahide najaro dosseniji bicani madija mari mari ihicanabaqqui najari. Dsotodepa najaro dosseniji mittamanajarideni ia mari tocana-baqqui-manadsa pajissa tojani iadsa ahuato inanamanajarode. ⁴Dio naco pocca dosseniji dsati pajissa tojani iadsa ahuato inanajarode. Aji qqui inapo-jerajaro ahuato inajaropi huapi tade. Aja comaqquri najarideni ihinanomibaqqui najari, canahatoriri canaridsajari, pohua jipa tajaridsa naco Pohua Corime ihinanaridsa najaride.

**Jesopa pina iassa nadsa imecote
tojajari, ia tonassiajabbaqquihijine**

⁵Nidsaranibote Dio dsama dsati inanadsapi najarodsa imadinitohui. Naraha Diopa pocca dodosse tabaqqui memehuaiccadsa: –Najaro dsama dsaticca tamine tiquejenaji –najarajari. ⁶Pohua Bedina najaro dsama dsaticca tamine tojahitohui. Najaro imapi Dio Atti dsodo napojarodsa anijaro: –Abi Dio, Tiana deni tijani. Ia madijapi ajimani iquejenani. Naraha ¿itohui teti huatomajaroqui? ¿Nejecotohui iadsa bica tinajaro? ⁷Tijinepa ticca dodosse tabaqqui memehuaicca deni toquejenaccahi. Ia madijapi ia ajimani tinanabaqquicajaro. Naraha dsotodepi ia deni tinanabaqqunitohui. Ticca deni

tojehe, ticca biquehe iadsa tinanaridsanitohui.

⁸Nema tinanadsapi tijine memehuaajicca, namihuaajicca huapima naco iadsa ajamani toquejenahitohui. Iana poccadeni tamine iquejenanitohui –nani Dio Atti dsodo nanidsa.

Jehe, madija ojariapa huapimadsa deni tojadsapa huapima pohua attidsa iboraquiri nahitohui. Pohua attidsa ibo tahijine nohuerahitohui. Jidapapi najaro deni tojehe pohuadsa toja-jeraccani. Huapimapa pohua attidsa iboraquiri najaraccahi. ⁹Najari madija ojaria deni tojajaripa Jeso. Puhuana deni tojaporaha Diojine ajamani tojaccajari. Puhuapa Dio Bediraha pina madijassa naha tojadsapa Dio pocca dodosse tabaqqi memehuaajiccana deni toquejenaccajari. Nadsama Dio iadsa huati cahanari canadsa Pohua Bedi Jeso dsoqquehijine eccorajari, huapima pohuadsa jehe inajaro ia tonassiajabaqqihijine. Jesopa dsoqqehe inahanadsa jidapapa Diojine deni tojajari. Huapima pohuadsa iboraquiri inanijine Dio pocca deni tojehe, pocca biquehe pohuadsa inajaro. Jehe, najari Jeso pohua tahimari jidapana iadsa ahuato tani, onajaro. ¹⁰Memecca namicca huapimapa Dio pocca. Pohuajine nahatoridsapojari, Pohuajine anidsanapojari. Pohua Bedidsa jehe quinajarideni pocca deni tojehe-dsa toquejenahijine tohuini najari. Najarojine Jeso ocasserani inahanadsa dsoqquehijine Imehi Dio ecossajerajaro. Nama nadsapa Dio Pohua Bedi Jesocriso madija Tonassiajade tojahijine inapajirahissa tajari.

¹¹Jeso pohuajine imarideni tohuirejaridenipa Abi Dio ojariadsa: –Abi –quinajari. Jeso naco Dio Bedi tojajari. Nama nadsapa Jeso iadsa: –Ohuemecotedeni –nahijine cappina-jarajari. ¹²Najaro imapi Dio Atti dsodo napojarodsa anijaro, pina Jeso Imehidsa huati huati tajarissa najaro:

–Abi Dio, ticca ima ohuemecotedenidsa huati huati onanitohui.

Tetti jijirihuaji iqueriquidsa pohuadeni mittamanahijine: “Abi Diopa bica tahi, bica tahi” jiri jiri onanitohui –najari.

¹³Dio Atti dsodo nani onihidsa naqui:

–Ohuapi Diodsara pajissa onanissa dsanaponitohui –najari.

Dio Atti dsodo nani onihidsa naqui:

–Ohuapi aji, Diocca ejedenideni ohuadsa inanabaquijari tedseje idomo huajaro –najari.

Jehe, najaro ima Dio Atti cacomerabote dsodo inajaropi pina Jeso pohua Imehi Diodsa huati huati tajarissa najaro.

¹⁴Nadsama Diocca ejedeni iapi essire icaji, itone icaji, emene icaji najaro. Jeso naco pina madija iassa naha tossonadsapa assire caji, tone caji, emene caji najari. Nama nadsapa dsoqquehijine pajirajari. Dsoqqedsapa Diocca huadidsa deni tojajari. Aja Diocca huadi Satanapa tahide madija paja inajacarihijine pajiraraha Jesojine pocca dacorehe tossamojaro. ¹⁵Jeso pohua ccaccoradsa dsoqqedsapa ia acco tocamabaquijari, paji idsoqquerijeranjine. Tahidepi dsoqqehe

paji idsoqquerinicca noppineni icappinehe imadi-dsanaporaha nema idsanapo-jeranjine ia tappa tabaqqijari. ¹⁶Jesopa Diocca dodosse tabaqqi memehujicca acco camade ccajona-jarajari nahatoqquri inajaro. Abarahao potemahi iquejenajaro ia acco camadena ccajonajari. ¹⁷Pohuapa pina iassa najarijine ia acco camade pajirahissa tajari. Nama nadsapa pohua pohua ccaccoradsa dsoqqedsapa icca daniji Diodsa tojajari. Najaria icca imasiri manaconi tojajari. Pohuadsa pajissa inadsapi Diopa iadsa: –Epeje, tiadsa ohuadi-gerani. Ticca imasiri ohuati ajimani –najari. Najarojine –Jesopa icca daniji *Diodsa dada toqquimade deni tojahicca –inajaro. Pohuapa iadsa huati huana, Imehi Diodsa huati huana tajari. Maidsera tajari, Imehi Diodsa dissera tajari. ¹⁸Pina iassa nadsa ocasserani ahua-jaride. Satanapa imasiridsa inana-hijine pohuadsa dissera taraha Jesopa dadoradsa imasiri inana-jerajaro. Nama nadsapa ia acco camade nahato tajari. Satanajine tohuini inanicca ahuatodsa imasiri inana-geranjine Jesocca acco camehe iadsa pajiranissa tajaro.

**Moisesipa ajamani,
Jesocristona deni tojajari**

3 ¹Jehe ohuemecotedeni, Diopa pocca madija Pohuadsa bicaqquri tiquinanjine tiadeni tocattejid-sabaqqijari. Nema nadsapi Jesodsa tibodideni huatonissa taji, onajaro. Pohuadsa jehe inadsapi pohua tahimari ehecomera najaro. Pohuapa Imehi Diocca dosseniji ccaronajari, iadsa Imehi tahimari huati tahijine. Pohua naco icca ima huahuati

toqquimade deni tojahicca. Icca ima Imehidsa huati huati tajari, inajaro. ²Pohuapa madija cacahuade tojahijine Imehicca dossehedsa ibora tajari. Nama nadsapa pocca ima pina Moisesicca imassa najaro. Moisesi naco Diocca dossehedsa ibora tadsapa Diocca madija cacahuade tojajari. Aji Diocca madija inajaropi Diocca odsacca ihinanajaro. ³Aji icca odsapi nanahatode cajijaro. Odsa bica tocana-dsapi: –Odsa bicani –inajaro. Naraha nanahatodena denima bica tajari. Najaro imassa najaro: –Moisesipa bica tahi –inaraha Jesona denima bica tajari. Pohuapa Moisesidsa deni tojajari. ⁴Nadsama odsa huapimapi nanahatodena ihinahatomana najaro. Naraha dsama huapimadsa aniridsa-jaripa Dio Pohuana inahatoridsajari. ⁵Moisesipa Dio Attidsa ibora tadsapa Diocca odsacca madija cacahuade tojajari. Naraha pohuapa Diocca medse. Moisesi madidsa dsepe iijjaripa Diojine pohua nocodsapa qqui tajari, mittajari najaro Diocca madijadsa ehecomera najaro. Najaropi nidsa dsotode Dio pohuadenidsa huati tahijine ehecomerapo najaro. ⁶Naraha Jesocristopa Dio Bedi. Imehi Attidsa ibora tadsapa pina Moisesissa najari. Diocca odsacca madija cacahuade deni tojahicca tojajari. Nadsama ia Jesodsa jehe idsanaponissa tadsa ia tonassija-baqqihijine tohui imadijaro naqui Diocca odsacca madija iquejenajaro.

**Dio Pohua Attidsa iboraqquri
inadsapi pocca dsama
bicanihuaji jassi inanitohui**

⁷Jehe, ettipti: –Diocca madija iquejena-dsanapona –inadsapi Dio Corimejine dsodo naniccadsa iboraqquri inana. Najaroa aji:

–Jidapapi Dio tiadenidsa huahua nahi timittamandapsapi ⁸teribodeni sibaququiri nejerana.

Pina maittaccadsama ticcadeni idi Isaraeri potemahidenissa tiquinejerana.

Pohuadenipa huaribodeni sibaququiri nadsa Dio Attidsa tohuibomanajari.

Dsama huamoni ssono caji, siba caji tanihuaji madiridsamanadsa Dio jipera tahicca ihinanaridsamana nadsapa Pohua nattome quinajarissa najari.

⁹Pohua Attipa: “Huajano 40 naha ohuacahuabaququidsa ocanahatoriri canani qqui qqui dsanapomanaraha ‘Dio ia tohuacahuabaququijarahi’ quinajari.

Attideni nama quinadsapa pina Ohua nattome quinajarossa najaro.

¹⁰Nama quinadsapa pohuadenidsa ohuadidsa Ohuattipi:

Jaho, Ohuadsa bodideni huatojaradsa ima onihi tohuira dsanapomanajari.

Occa marinaja ssamoququiri najari, onajaro.

¹¹Nadsapi occa huadiema Ohuattipi: Najaridenipa occa dsama bicanihuaji onamadi-baqquidsas jassi quinahijine-raha

nahihuaji jai tojedsima-jarana, onajaro” nahi nade Dio –nani nade Dio Atti dsodo nanidsa.

¹²Paji ohuemecotedeni, tibodidenidsa tabaccorehe tecahua-manajeraji. Tibodidenidsa jehe

tiquinanissa tejeradsa naqui Dio camitta tajari Pohuadsa tiajimanarana. ¹³Ajima tiquinanina bica tani: Huajijiradsa tiadenira ticatidserara canaji. Aji jidapana Dio tiadenidsa huahua nahi paja naccadsa: –Dio Atti imittana –titiquina nadsa acco acco ticanaridserara canaji. Nema tinanamanadsapi imasiri tiadeni tocamaidsabaququi-jeranitohui. Dio-dsa naqui tibodideni tohuibo-jeranitohui. ¹⁴Jesocristodsas iquejenanijinepi pohuadsa jehe idsanaponijine. Pina tahide pohuadsa jehe inadsama najarossa inajonehe dissera idsanapodsas pohua ccanihicca huada bacco inadsapi pohuadsa iquejena-dsanaponitohui. ¹⁵Pina aji dsodo onapojarossa najaro Dio Atti dsodo onapomajaro:

–Jidapapi Dio tiadenidsa huahua nahi timittamandapsapi teribodeni sibaququiri nejerana.

Pina maittaccadsama ticcadeni idi Isaraeri potemahidenissa tiquinejerana.

Pohuadenipa huaribodeni sibaququiri nadsa Dio Attidsa tohuibomanajari –nani nade Dio Atti dsodo nanidsa.

¹⁶¿Nejecjaridenia Dio Atti mittamanaraha Pohua Attidsa tohuibomanajaritta? Isaraeri potemahi dsama Ejitohuaji Moisesi iaquena-baqqujaridenina paja. ¹⁷¿Nejecjaridenia huajano 40 naha Dio pohuadenidsa huadi-dsanapojaritta? Isaraeri potemahi tabaccorehe inamanajarodenina paja. Poccadeni tabaccorehe manaconipi dsama huamoni ssono caji, siba caji tanihuaji dsodsoququeri naridsamanajari. ¹⁸¿Nejecjaridenidsa Dio

Attipa: –Jaho, najaridenipa occa dsama bicanihuaji onamadibaquid-
 dsa jassi quinahijineraha nahihuaji
 jai tojedsima-jarana –najaritta?
 Isaraeri potemahideni Dio Atti-
 dsa tohuibomanajaridenina paja.
¹⁹Pajissa pohuadeni tahimari
 nahatoqqiri inani. Diopa dsama
 onini Canahadsa pohuadeni jassi
 inanabaquihijineraha Pohuadsa
 jehe quina-jarajarijine jai tojedsima-
 jarajari quinade.

**Dio pocca jassinaja aninihuaji
 ia jassi tonanabaquid-
 ia tonamadibaquid-
 dsanapohuijine**

4 ¹Diocca jassinaja aninihuaji
 jassi inanijine iadsa tohuaba-
 ccani. Nanihuaji jajedsimanijinepi
 mohuaradsa imadina, onajaro.
 Mohuaradsa imadi-jeradsapi ojaría
 dsori taja camarana. ²Pajissa iadsa
 Diocca ima bicani anijaropi ia mari
 tocanabaquid-manadsa imitta-
 jarode, pina Isaraeri potemahideni
 mittamanapojarissa najaro. Pohua-
 denipa najaro ima bicani mitta-
 manaporaha ponima inanamana-
 jaro. Pamahapa pajissa quinaraha
 motapa pajissa quina-jarajari. ³Iana
 pajissa inadsapi Diocca jassinaja
 aninihuaji bacco inajaro. Naraha
 Pohuadsa pajissa quina-jarajarideni-
 dsapa Dio Attia:

–Nadsapi occa huadiema
 Ohuattipi: Najaridenipa occa
 dsama bicanihuaji onamadi-
 baquid-
 dsa jassi quinahijineraha
 nahihuaji jai tojedsima-jarana,
 onajaro –nahi nade Dio.

Najaro jassinajacca imapi Dio Pohua
 meme, nami huapima nahatode
 tojadsapa huada 6 nehe dsepe

ijijari. Inahatoridsehe jicanissa
 tadsa jassi najari. ⁴Aji huada 7^{cca}
 imapi Dio Atti dsodo nanidsa ajima
 najaro:

–Dio dsepe ijia jicahissa tadsa
 huada ssajapa jassi najari.

⁵Jassinajacca imapi iadsa ahuato
 tajaro, Dio Atti dsodo nanidsa
 dsodo napojaro. Ajidsa dsodo
 onapomajaro:

–Najaridenipa occa dsama
 bicanihuaji onamadibaquid-
 dsa jassi quinahijineraha nahihuaji jai
 tojedsima-jarana –nahi nade Dio.

⁶Diocca ima bicani aji dsama
 bicanihuaji jassi quinahijinecca
 ima mittamanapojaridenipa Dio
 Pohua Attidsa iboqquri nadsa nahi-
 huaji jai tojedsima-jarajari. Naraha
 dsotodedeniccana Diocca jassinaja
 aninihuaji jassi quinahijine pohua-
 denidsa tohuaba-dsanapoccani.

⁷Diopa madija jassi inanabaquid-
 hijine jipa tajari. Najarojine pocca
 jassinaja aninihuaji huada onihidsa
 jai tojedsimahijine najorapomajaro.
 Maittaccadsama Dio Atti Dabi-
 cca jijiridsa dsodo nani anijarossa
 najaro dsodo onapomajaro:

–Jidapapi Dio tiadenidsa huahua
 nahi timittamanadsapi teribodeni
 sibaquid-
 dsapi nejerana.

Aja Dio Attipa: –Jidapana
 –nadsapa pocca jassinaja madija-
 dsa tohuabaccani iadsa ahuato
 tajaro. ⁸Nadsama aja Moisesi biji
 accode Josohuena Isaraeri potema-
 hiddeni dsama Canahahuaji iaque-
 dsimabaquijari. Najaro dsama
 bicanidsa bacco todsimamanaraha
 jassi quinahissa tajarahi. Diocca
 jassinaja pajissaccadsa toquejena-
 jarajari. Nadsapa dsotodedeniccana
 jai tojedsimahijine huada onihí

najorapomajaro. ⁹Najaro imapi ia Dio pocca madija iquejenarodsa pocca jassinaja aninipaji naccajaro. ¹⁰Ia huapima Diocca jassinajadsa iquejenadsapi jassi inanissa tanitohui. Nanidsapi idsepe ijipomajeranitohui. Pina tahide dsama nahatoponi Dio Pohua dsepe jicadsa jassi najarissa inanitohui. ¹¹Nadsapi najaro Diocca jassinajadsa iquejenanijine disseraqquri idsanapona. Icca madija dsori taja cama-jarahijine. Pina tahidedenicca Diodsa iboqquri nadsa dsori tocanirejari-sca quina-jarahijine, onajaro.

¹²Dio Attipi dacorehe caji, camittehe caji najaro. Pina jadsirecca massito cajadsire-qquimera-jarossa najaro. Najaro massitopi bani imedsa jaro tocadsimadsa tone tohuarihidsa tajo tahijine pajira, appone ahuatohuijine tone icanarobehijine pajira najaro. Najarossa najaro Dio Atti ibodidsa toqquedsimadsapi icca ima nattome inajaro. Ibodi huatohue, ibodidsa tohuini inanicca huapima bica tanicca, tabaccora tanicca ahuato inanajaro. ¹³Jehe, Dio huapima inahatoridsajaripa huapima qqui tahissa tajari. Pohua qqui tajarahijine inajimahi ssamo tani. Icca ima naqui Pohuadsa ahuato tajaro. Nidsa icca ima ecomeranjinepi Pohua baccohuaui idomo huanitohui.

**Jesopa icca ima Diodsa
huahuati toqqumade
deni tojahicca**

¹⁴*Dio Bedi Jesopa Imehi madihuaju toccamacossanidsapa jidapana memehuaju madijari. Pohuapa icca ima Imehi Diodsa huahuati

toqqumade deni tojahicca. Ohuaha pina pohuassa najari nohuerahi. Pohuadsara pajissa inadsa pohuatohui disseraqquri idsanapona. ¹⁵Aja icca ima Diodsa huahuati toqqumade deni tojahicca Jeso pina iassa naha namidsa madidsapa imasiri totonanade nattome inajari. Pina ia nanattome najarissa najari. Imasiri totonanade attia: —¿Jesopa ohuattidsa ibora taco? ¿Ibo tarana? —naraha Jesopa Imehi Diodsara ibora tadsa imasiri inana-jerajaro. Nama nadsapa iadsa huati huana tahi. Ibodi mijira tani nahato tadsa ia acco camade jipa tahi. ¹⁶Pohuadsa iajressina. —Jesopa dacorahi, ia acco tocamabaqquihijine pajirahi —inana. Pohuapa bica tahi. Iapi bica inejeraraha iadsa huati huana tahi. Iadsa ima anidsapi imasiri inana-jeranjine pohuadsa huati inadsapi ia acco tocamabaqquihitohui.

**Diopa tahide madijadsara
huahua huahua nanajona
najari, Pohuadsa dada
toqqumade deni tojahicca
toquejenahijine**

5 ¹Maittaccadsama Isaraeri potemahidenicca *Diodsa dada toqqumade deni tojahicca tojahijine Dio Pohuana madija ojari ojari naha ihicattejidsa najonajari. Najaricca cacahuehepi ajima najaro: Tahidepi madijadenicca ima Diodsa huati huati ihiquima najaro. Onihipi: —Abi Dio, Tiapi bica tinani —quinahijine pocca-deni daniji Diodsa da da ihiquima najaro. Onihipi imasiri manaconi bani bedi emene Diodsa da da ihiquima najaro. ²Diodsa dada toqqumadepa Diodsa dsepe ijiraha pohua naco

madijaja najari. Diodsa ibora tahissa tahijine pohuadsa naqui najo tani. Nama nadsapa Dio Atti mitta-manahissa tarajaridenidsa huati huana tadsapa mohuaradsa huati huati ihicanabaqqi najari. ³Diodsa ibora tahissa tahijine pohuadsa najo tadsapi pohua naco imasiri inana tani. Nadsapa madijadenicca imasiri manaconi Diodsa dade tojadsapa pohua pocca imasiri manaconi naqui da da ihiquima najaro.

⁴Nadsama madijapa pohua tohuini nadsa: –Ohuana Diodsa dada toqqimade, imarideni huahuati toqqimade deni tojahicca ojana –najarajari. Nohuerahi. Dio Puhuana madija icattejidsajari, Pohuadsa dada toqqimade, imarideni huahuati toqqimade tojahijine. Pina maittaccadsama Moisesi imecote *Araocca imassa najaro. Isaraeri potemahidenicca daniji Diodsa dada toqqimade tojahijinepa Dio Puhuana icattejidsajari. ⁵Jesocristo naco pohua tohuini nadsa: –Ohuana Diodsa dada toqqimade, imarideni huahuati toqqimade deni tojahicca ojana –najarajari. Dio Puhuana Bedi icattejidsajari, najaro cacahuehe deni tojanicca cajihijine. Nadsapa Bedidsa Atti ajama najari:

–Tiapi occa Ejedeni tijani.
Jidapana ticca Abi ojani,
onajaro –napohui nade.

⁶Dio Atti dsodo nanicca onihidsa naqui huati tapomajari:

–Tiapi madijacca daniji
Ohuadsa dada toqqimade,
imarideni huahuati toqqimade
nema tidsanaponitohui.
Pina Ohuadsa dada toqqimade
Merequisedecassa tanitohui
–nahi nade Dio.

⁷Jesocristopa ajijaro namidsa madiccadsa huajjiradsa Imehi Diodsa huati huati tajari. Ocasserani ahuadsa ojiema Imehidsa huati huati tajari. Bodi qquedsadsa naco atti mohui tadsa huahua najari. Imehipa dacorehe cajijari. Pohua Bedi dsoqqueheda inassiahijine pajirahi. Naraha Jesopa Imehi Attidsa ibora tadsa: –Epeje Abi, jipa tinaniccadsana ibora onajaro –najari. Nadsapa Imehi Pohua Bedicca iborehe qqui tadsa Bedicca huatinaja mittajari. ⁸Nadsama Dio Bedi Jesocristopa ocasserani ahuarahijine pajiraraha nama naha ocasserani ahujari. Nama najaripa Imehi Dio Attidsa ibora tahijine tohuattajari. ⁹Pocca iborehe Diodsa pajiranissa tadsa Diojine madija Tonassijade tojahijine inapajirahissa tajari. Huapima pohuadsa iboraqqiri najaridenidsa tossiejehe jiquejeranicca inanaridsajaro. ¹⁰Dio Puhajine naco madijacca daniji Pohuadsa dada toqqimade, imarideni huahuati toqqimade deni tojahicca tojajari. Pina maittaccadsama Diodsa dada toqqimade Merequisedecassa nahijine najaro cacahuehe Bedidsa inanjaro.

**Diocca dosseniji najo
tanicca naqui iattana**

¹¹Jehe, nadsapi najaro ima tiadenidsa denima dsodo onanijine-
raha najo tani. Tohuatti najora
taniccadsa dsodo onanijine pajirajeri.
Tiadeni naqui timittamanijine
najoqqiri tiquinani. ¹²Ajina,
huajano huapi taha Jesodsa jehe
tidsanapomanaraha ¿pohua tahimari
maride tipajiramaqu? Ssamoqqiri
tiquinani. Diocca

marinaja najora tanicca timitta-
mananissa tejeradsapi: –Najarora
imittapomana –titiquina najaro.
Jaho ¿nejecotohui marinaja najora
tanicca tohuinira tidsanapomana-
jaro? Nema tiquinadsapi pina
ejedeni tobaccocassa tiquinajaro.
Ejedeni tobaccocapa dsamatapa
jipade pajiramana-jarahi. Dsojora
tomi tomi quinajarissa tiquinajaro.
¹³Aja dsojodsara madimanajari-
denipa ejedeni. Pohuadenipa ima
bicani tocattejidsade ssamoqquri,
ima tabaccora tanicca huattajode
ssamoqquri najari. ¹⁴Naraha
dsamatapa jipade pajiramanajari-
denipa jadahideni. Pohuadenipa
bodideni tocahatteradsa ima
bicani tocattejidsade nahatoqquri,
ima tabaccora tanicca huattajode
nahatoqquri najari. Jadahidenipa
Diocca dosseniji najo tanicca
mittade pajiramanajari.

**ICCA JEHENIJI INEBONIPi
oppina tani**

6 ¹Jehe, Diocca marinaja denima
icahatterana, pina jadahideni
tocahattera-dsanapojarissa inana,
onajaro. Jesocristodsa jehe inapo-
dsapi Diocca marinaja najora tani-
cca iattapojaro. Naraha: –Najarora
imittadsanapona –inejerana.
Aji marinaja tahidecca imittapo-
jaropi ajima najaro: Icca imasiri-
jinepi *dsoqqehe jiquejeranicca
najidsohuedsa iquejenanijineraha
icca imasiri inebodsa Diodsa
jehe inadsapi icassiejeranithohui.
²Onihihi Jesodsa jehe inani ahuato
tanijinepi totopa icajijaro. Onihihi
Dio Corime tojaridsahijine tati-
denidsa bara quinadsa Diodsa
huati huati toquinajari. Onihihi

nidsa dsotode jicajarideni Diojine
nahatonimanahithohui. Dsotodeccapi
*madija huapimacca ima cattede
Dio Pohua baccouhaji idomo huadsa
imasiri cajimanajaridenipa Dio
ettajobaquidsa najidsohue jique-
jeranihuaji toquejenahithohui.
³Jehe, najaro marinaja huapimapi
icahatterapojaro. Jidapana Dio
ia acco tocamabaquidsa denima
denima icahattera-dsanapodsapi
pocca marinaja najo tanicca naqui
imittanithohui.

⁴Naraha madija mota denima
tocahatterahijine jiperaqquri
najaripa Diodsa jehe quinaporaha
dsotode: –Epejena, Dio onebona
–quinajari. Najaridenipa Diodsa
jehe quinapodsa Diocca pajissehe
pohuadenidsa ahuato tajaro. Dio-
cca daniji bicani pohuadenidsa
tojajaro. Diocca madija tedseje Dio
Corimecca dacorehe nahatoqquri
najari. ⁵Dio Atticca biquehe naqui
nahatoqquri najari. Jesocristocca
dacorehe cajimanapodsapa Jeso
ccaronapomadsa pocca dacorehe
ahuato tanithohui nahatoqquri
najari. ⁶Naraha Dio inebomana-
dsapa pina Diocca daniji ttai ttai
inanamanajarossa najaro. Pina Dio
Bedi ahua porimacossanidsa coba
idsanamana-pomajarissa najari.
Pohuadenijine jehe quina-jarajari-
deni Jeso jaja icanaquimanajari.
Madija nama quinajaripa Diodsa
toquejenani-pomahijine ssamo
tani. ⁷Madija nama quinajaridenipa
pina huidsajacca nami tabaccora
tajarossa quinajari. Aji huidsaja-
cca nami bicanipi passo ccadsa
ppaja tojadsa ppa nahi moro tahissa
tajari. Nadsapa huidsajaja jinede bono
huemahi cajihithohui. Nadsapi najaro

huidsajacca nami Diocca biquehe cajijaro, inajaro. ⁸Naraha huidsajacca nami bica tejeradsapi passo ccadsa ppaja tojarah cotihi, dsero ssacaca taniccara moro taridsajaro. Nadsapa huidsaja jinede bono cappirahitohui. Nadsapi inebonitohui. Najaro huidsajacca nami Diocca najidsohue cajijaro, inajaro. Najarossa quinahitohui madija naco pina huidsajacca nami tabaccora tajarossa quinajaridenipa Diocca najidsohue cajimanahitohui.

Diocca huatinajadsa jehe inajaropi dacorajaro

⁹Ohuemecotedeni, tiadenidsa ohuati huana tani. Tiadenidsa Dio inebomanahicca ima dsodo onaraha obodidsa nahato onajaro: Tiadenipi pina najaridenissa tiquinejerani. Dio tinebomana-jarahitohui. Jeso-cristo tahimari icassiejeranijineccadsa pajissa tiquinajaro. Najarodsa disseraqquri tidsanapomanani nahato onajaro. ¹⁰Diopa maidsera tahi. Pocca imapi borocco tani. Ticcadeni ima huati ajama-jarahitohui. Pohuadsa tetideni huanaqquri nani ahuato tani. Aji pocca tohuati huanehema timecotedeni Jesodsa jehe quinajari acco acco titicanabaqqumana najonajaria jidapana ajijaropaji. ¹¹Nadsama najarossa tinanamana-dsanoponijine tohuini onajaro. Timadimandsama Diocca tohuati huanehema timecotedeni acco camade nema tidsanapomanajaroa tijicaqquni bacco tiquinana, onajaro. Nema tidsanapomanadsapi tibididenidsa nahatoqquri tiquinanitohui: Dio huati tapojaricca tohuini timadimanajaropi pajissa tiadenidsa

tojanitohui, onajaro. ¹²Timijiramana tejeraji, Diodsara disseraqquri tiquinaji, onajaro. Aja Diodsa jehe quinahissa tajaridenipa mohuaradsa Pohua huati tapojariccatohui madimanajari. Nidsa dsotode Pohua huati tapojaricca pohuadenidsa tojanijine nahatoqquri najari. Nadsama tiadenidsa ohuattipi: Pina pohuadenissa tiquinana, onajaro. Disseraqquri tiquinadsapi *ima bicani Dio huati tapojaricca tiadenidsa tojanitohui.

¹³Maittaccadsama Diopa Abarahaodsa ima bicani tojanijine huati tahijinepa tahide ajama najari: – Ohua onima tiadsa huati onajaro. Omaidsa-jerani. Tiadsa Ohuattissa onananitohui –napojari. Nama najaripa deni tojahicca ohuaha nohuerajarijine Dio Pohua onidsara huati tajari. ¹⁴Nadsama Pohua Atti Abarahaodsa ajama najari:

– Pajissa tiadsa ima bicani onananitohui. Ojine tipotemani huapi tahitohui –nahi nade Dio.

¹⁵Nadsapa Abarahao Dio pohuadsa huati tajaricca tohui mohuaradsa madijari. Dsotode Dio pohuadsa huati tapojarissa nehe tojajaro.

¹⁶Aja madija pohua atti: –Pajissara huati onana –nadsapa deni tojajari onima huati huati tajari. Pina Dio onima huati tadsa: –Dio ohuatti nahato tahi. Ohuattissa onana-jeradsapi ohua najidsohue bica tani –najarissa najari. Nama nadsapa pohua attissa inanani ahuato tajaro. Mittamanajari-deni pohua attidsa: –¿Pajissaqui? ¿Pajissa jerarane? –quina-jarahijine. –Pajissa huati tajari –quinahijine. ¹⁷Najaro imassa

najaro Dio huati tadsa pocca huatinaja cajimanajarideni nahatoqquiri nahijine Pohua Attipa: –Ohua onima huati onajaro. Ohuattissa onananijine pajissa –najari. Nama najaria Pohua Atti mittamanajaridenipa: –¿Pajissaqui? ¿Pajissa jerarane? –quina-jarajari. Attidenipa: –Jehe, Diopa pajissa huati tajari. Pohua Attissa inananitohui –quinajari. Pocca huatinaja cacajiquimera-jerani pohuadeni nahatoqquiri najari. ¹⁸ Jehe, Dio iadsa huati tadsapa: –Tiadenidsa ajima onananitohui –nadsapa pocca huatinaja cacajiquimeranijine ssamo tani. Pohua Atti: –Ohua onima huati onajaro, omaidsa-jerani –nadsa naco cacajiquimeranijine ssamo tani. Diopa maidsera tahi. Pohna ia tohuacahua-baqquihijine tohuini inadsapi Pohnadsa iquejenajaro. Pajissara huati tajaricca ima imittadsapi etidsejaro. Pohna huati tapojaricca iadsa pajissa tojanijine tohuini imadijaro. ¹⁹ Nadsama Diocca huatinajadsa: –Jehe, pajissa iadsa tojanitohui –inajaro. Najaro jehenijipi dacorajaro. Pina ahua canoa ssoosocque cadzana dappo todsani dacorajarossa najaro. Dappo dsananissa tadsa canoa tocatabo-jerajaro. Icca jeheniji najarossa nadsapi Dio madihuaji jajedsimajarossa najaro. Pina Diodsa dada toqqimade deni tojahicca imassa najaro. Pohna dada toqquima bodihuaji totoquedsima najari, Diodsa dade, Diodsa huatide. *Huahuacossa etero sibabote idenihuaji, aja *Dio anihuaji bica tanicca quiquinanihuaji Diodsa totoquedsima najari. ²⁰ Najarossa najaro Jesopa Imehi

madihuaji toqqedsimajari. Najaropi ia Diohuaji bacco inanijine ijahine inahabajaro. Nama nadsapa pohna icca daniji Diodsa dada toqqimade, icca ima huahuati toqqimade deni tojahicca nama dsanapohitohui. Pina Merequisedeca Diodsa dada toqqimade nama dsanapojarissa nahitohui.

Merequisedeca tahimari

7 ¹ Merequisedecapa maittaccadsama madijari. Odsa panani onini Saremecca tamine. Pohna Dio deni tojaridsa dsepe ijijari. Pocca madijacca daniji Diodsa dada toqqimade tojajari. *Abarahao naco nahihuaji madiridsadsa dsama onihicca dsama onihicca taminedenicca madijadsa jadsire inajaro. Cahadiremanadsa taminedeni inajicaridsadsapa Abarahodenina deni toquejenajari. Jadsire jicadsa Abarahoeni jahinidsapa tamine Merequisedeca toccajari, Abarahao bacco ijidsahijine. Bacco ijidsadsapa pohna tedseje Diodsa huatidsemanajari. Abarahodsas ima bicani tojanijine Merequisedecapa Diodsa huati tajari. ² Aja Abarahodenipa jadsiredsas deni toquejenadsa pohnadenijine jicajari dsepedenitaji huapi tehe eccanimanajaro. Bani bedi, madija poccadeni *medse tarabidsajine naco eccanimanajari. Nadsapa Abarahao pohnadsa tojajari *mota Merequisedecadsa da inajari. (Najaro caria attidsapi: décima, quinajari.) Nadsama Merequisedeca pohna onicca imapi: Tamine imari bicabote, quiquinanajari. Pocca odsas panani onini Sareme naqui: Jonehe, quiquinanajari. Nadsapa Saremecca tamine

tojajarijine pohuadsa naco: Jonehecca tamine, quiquinanajari. ³Pohua tahimari mota nahato inaraha motapi ssamoqquiri inani. Pohua imehi oni, imeni onini, biridideni oni, midinideni onini naqui ssamoqquiri inani. Pohua tossonahicca huada, dsoqquehicca huada naqui ssamoqquiri inani. Nama nadsapa pohua tahimaripi pina Dio Bedi tahimarissa najaro. Diodsa dada toqqumade nama dsanapohuitohui.

⁴Jehe, nadsama Merequisedeca deni tojajari tahimaridsa tibodideni huatonissa tana. Icca idi Abarahaopa jodiideni iadsa deni tojajari. Naraha pohuadsa tojajari-cca mota Merequisedecadsa da inajaripa pina Merequisedecadsa: –Deni tijani –najarissa najari. ⁵Merequisedecapa Moisesi tossona-jaraccadsama tahide madipojari. Abarahao jinodi Rebi tossona-jaraccadsa naco Merequisedecapa madipojari. Dsotode nidsaranibotena Moisesidsa Dio pocca dosseniji da inajaro. Najaro Diocca dossenijidsa Rebi potemahidenipa Diodsa dada toqqumade toquejenajari. Pohuadenipa Abarahao potemahi, pohuadeni imecotedeni huapima naco Abarahao potemahi. Naraha Rebi potemahidenina pohuadeni imecotedeni cajimanajaricca mota nanaccade toquejenajari. ⁶Nadsama Merequisedecapa Rebi potemahi jararaha Abarahao cajijaricca mota idijaro. Diopa tahide Abarahaodsa huati tapodsa pocca biquehe pohuadsa tojapojaro. Naraha dsotode Merequisedecapa Abarahaocca daniji ididsa Abarahaodsa ima bicani tojanijine Diodsa huati tajari. ⁷Nama nadsapa Merequisedeca

pohuana Abarahaodsa deni tojahi ahuato tajari. Najaro imapi ia huapima nahatoqquiri inani. Madija pohua tessedsa Diocca biquehe tojanijine huati tajaripa deni tojajari. Diocca biquehe pohuadsa tojajarona ajamani tojajari.

⁸Jidapana Rebi potemahi Diodsa dada toqqumadedenipa madija cajimanajaricca mota ihinaccamana najari. Naraha najaridenipa madija quejenaja najari. Dsoqquemana tahi. Naraha madija cajimanajaricca mota nanaccade ojariapa pohua dsoqquehicca imapi ssamoqquiri inani. Najari Merequisedecapa madicajari, quiquinanajari. ⁹Ima onihi naqui. Rebi potemahi madija cajimanajaricca mota nanaccade toquejenajarideni tossonamanageraccadsa Abarahaopa Merequisedecadsa pohua cajijaricca mota da inapojari. Nema nadsapi etti: Pohuadeni naco Merequisedecadsa pohuadeni cajimanajaricca mota da quinajari, inajaro. ¹⁰Etti nema inajaropi pohuadenipa tossonamanageraccaraha pohuadeni potapojari Abarahaodsama Merequisedecadsa da quinajari, inajaro.

**Rebi potemahidenicca
cacahuehepi
cacajiquimerajaro**

¹¹Diopa pocca dosseniji Isaraeri potemahidenidsa da inadsapi Rebi potemahi Arao, pohua potemahidenina najaro dosseniji ecahuanajaro. Nadsapa poccadeni madija Diocca dossenijidsa iboraqquiri nahijine maride toquejenajari. Poccadeni madija imasiri inanamanadsapi poccadeni imasiri manaconi Diodsa da da

ihiquimamana najaro. Imarideni naqui Diodsa huati huati ihiquimamana najaro.

Nama nama quiquinanaraha poccadeni cacahuehejine madijadenicca ima Diodsa pajiranissa tanijine pajira-jerani. Nadsapa Dio Attia: –Ohuadsa dada toqqumade ohuahara tojana. Pina Merequisedecassa nana –najari. Nadsapi Puhajine najaro cacahuehepi cacajiquimerajaro. Puhadsa dada toqqumade ohuahapa Arao potemahideni jarahi. ¹²Nadsapi Rebi potemahi, Arao potemahidenicca cacahuehe cacajiquimeradsapi Diocca dosseniji naqui cacajiquimerajaro. Nadsapa Arao potemahideni Diodsa dsepedeni ijie nebojaro. ¹³⁻¹⁴Nadsapa madija ohuahana Diodsa dada toqqumade tojahijine toqquedsimajari. Najaripia ia Medsede Jeso pohua tahimari huati huati onajaro. Puhuapa Rebi potemahideni jarahi. Najaripia Isaraeri bedi Joda potemahi. Tahidepa Joda potemahideni Diodsa dada toqqumade toquejenahijine Moisesi huati tajarajari. Nadsapa najaridenipa Diodsa dade dsepedeni ijimana-jarajari. Nohuerajari.

¹⁵Naraha Diodsa dada toqqumade dsati pina Merequisedecassa najari toqquedsimadsapa najaro cacahuehe cacajiquimerani imittani ahuato tajaro. ¹⁶Diocca dosseniji tahideccadsa Rebi potemahidenira Diodsa dada toqqumade toquejenajari. Naraha Diodsa dada toqqumade dsatipa Diocca dosseniji tahideccassa najarahi. Najari dada toqqumade dsatipa dacorehe cajijari. Puhuapa madie jiquejeranicca

cajijari. ¹⁷Pocca ima Dio Atti dsodo nanidsa ajima najaro:

–Tiapi madijacca daniji
Ohuadsa dada toqqumade,
imarideni huahuati toqqumade nema tidsanaponitohui.
Pina Merequisedeca Ohuadsa
dada toqqumade nama
dsanapojarissa tanitohui
–nahi nade Dio.

¹⁸Nema nadsapi Diocca dosseniji tahideccapi nebojaro. Tojaparidsapi ponima tojajaro. ¹⁹Jehe, najaro marinaja Moisesi dsodo inapojaropi madijadenicca ima Diodsa inapajiranissa tanijine pajira-jerani. Najaro marinaja tahidecca pajirajeradsapi jidapana ima onihi tohui imadijaro. Najaropi denima bica tani. Najarodsa icca ima Diodsa tobica tani. Nadsapi Puhadsa iajiresinijine ipajirani.

Jesopa Diodsa dada toqqumade pajirahissa tajari

²⁰Diodsa dada toqqumade dsati tojahijinepa Dio Pohua Bedidsa Atti ajama najari: –Pajissara tiadsa huati onajaro. Ohuattissa onananitohui –napojari. Nama nadsapa najaro cacahuehe pohuadsa tojajaro. Naraha tahidedenicca dada toqqumadedenipa najaro cacahuehe cajimanahijine Dio pohuadenidsa huati tajarajari. Pina pocca marinajara da inajaro. ²¹Pohua Bedi ia Medsededsana: –Pajissara tiadsa huati onajaro. Ohuattissa onananitohui –napojari. Najaro imapi Dio Atti dsodo nanidsa dsodo napojaro:

–Ohuapi Dio. Pajissara huati onajaro. Ohuatti cacajiquimera-jeranitohui.

Tiapi madijacca daniji Ohuadsa dada toqquimade, imarideni huahuati toqquimade nema tidsanaponitohui –nahi nade Dio.

²²Dio Atti nama najaripa Jesona icca daniji Diodsa dada toqquimade tojajari. Puhuadsa jehe inadsapi Diodsa ia tonapajira-baqquihissa dsanapojari. Manaco Diopa iadsa: –Jehe, occa ejedeni tiquejenani –najari. Ima nema najaropi: *jehe canireniji dsati, inajaro. Najaropi denima bica tajaro. Tahidecca jehe canirenijipi ajimani tojajaro. ²³Tahidecca Diodsa dada toqquimade toquejenahipa huapi tajari. Ohuaha ohuaha najonamanajari. Dsoqqe-dsapa ohuaha toja, dsoqqedsapa ohuaha toja najonamanajari. Dsodsoqqeumeri najonajarijine ojaria madi-dsanapodsas dsepe iji-dsanapohuijine ssamo tani. ²⁴Naraha Jesopa dsoqqe-jarahi. Dsoqqe-jaradsapa Diodsa dada toqquimade ohuaha nohuerahitohui. Puhuana najaro cacahuade tojahi ojaris danapohuitohui. ²⁵Nama nadsapa puhuadsa jehe inadsapi puhujine Diodsa iajressijaro. Icassiejeras danaponijine naqui puhuana pajirahi. Puhuana madidsanapojari. Itohui Diodsa huati huati dsanapohuitohui, ia acco tocamabaqquihijine. ²⁶Nadsapa Jeso puhuana icca daniji Diodsa dada toqquimade, icca ima Diodsa huahuati toqquimade deni tojahicca iadsa pajirahissa tajari. Puhuapa ima bicanira cajjari. Puhuadsa ima nohuerajaro. Imasiri cappirahissa tajari. Puhuapa imasiri cajimana-jaridenidsa quejemaraha Imehi Dio puhuara inanajari. Idimacossanidsa deni inanajari. Nadsapa memehuaji

madimanajarideni huapimadsa deni tojajari. Ohuaha pina puhuadsa najari nohuerahi. ²⁷Puhuapa pina Diodsa dada toqquimade deni toquejenahiccassa najarajari. Najaridenipa huada huajjiradsa bani bedi inanadsoqqe-manadsa Diodsa da da ihiquimamana najari. Tahidepi poccadeni imasiri manaconina da da quiquinanapojaro. Dsotodena madija huapimacca imasiri manaconi da da quiquinanajaro. Naraha Jesopa nama najarahi. Puhuapa huada ojariedsa madija huapimacca imasiri manaconi da inajaropi puhua ccaccoradsa ahua porimacossanidsa inanadsoqqe-manajari. Pocca danijipi ojarijaro. Onihi nema napoma-jeranitohui. Puhua emene icca imasiri manaconi tojararopi pajiranissa dsanapojaro. ²⁸Dio pocca dosseniji Moisesidsa da inajaropi Puhuadsa dada toqquimade, imarideni huahuati toqquimade toquejenahijinepa madijara icattejidsabaqquijari. Naraha madijadenipa japariquiri nahi. Dio Attidsa iboraquiri nahissa tahijine pajiramana-jarajari. Naraha dsotode Moisesicca marinaja nattinipi Dio Puhua Bedina icattejidsajari, dada toqquimade deni tojahicca tojahijine. Puhua Atti Bedidsa: –Pajissara tiadsa huati onajaro. Ohuattissa onanaitohui –nadsapa Dio Puhua Bedi Jeso inapajirahissa tadsa madijacca daniji dada toqquimade, imarideni huahuati toqquimade deni tojahicca tojadsanapojari.

Jesopa icca daniji Diodsa dada toqquimade, icca ima huahuati toqquimade deni tojahicca

8 ¹Ima onihi onihi tiadenidsa huati onaraha ima bicani deni tojaniccapi ajima najaro: Icca daniji

Diodsa dada toqquimade, icca ima huahuati toqquimade deni tojahicca icajini. Najaripa Jeso. Diojine huapimadsa deni tojadsapa memehuari madijari. Dio Bicabote inori nahatonihuaji huittarijari. ²Pohuapa *Diodsa huahuatidsemana nahicca odsadsa dsepe ijijari. Najaropi Dio tadsari pajissacca. Ia Medsede Dio Pohuana Pohua tadsari icanahataro. Madijajine jerani.

³Nadsapa ajijaro namicca Diodsa dada toqquimade deni tojahicca huapimapa Dio pohnuadeni icattejidsabaquijari, Dio tadsarihuaji dsepedeni ihijimana nahijine. Aja Diodsa dada toqquimade deni tojahiccapa madija Diodsa huatidsemanadsa poccadeni da naqquinaja Diodsa da da ihiquimamana najaro. Madijadenicca imasiri manaconi bani bedi naco da da ihiquimamana najari. Nadsapa icca daniji dada toqquimade deni tojahicca Jeso naco icca imasiri manaconi Diodsa da inanijine cajiari. ⁴Jesopa ajijaro namidsapa icca daniji dada toqquimade tojarahi. Nohuerahi. Ajijaro namidsapa Diodsa dada toqquimade animanahi. Najaridenina madijadenicca da naqquinaja Diodsa da da ihiquimamana najaro. Pina Moisesicca marinajassa inanamanajaro. ⁵Pohnuadenipa ajijaro namidsa Dio tadsarihuaji dsepedeni ijimanajari. Najaro odsapi memehuajicassana naraha namihuajiccapa assirani jerani. Memehuajiccana assirani. Namihuajicca canahataropori corimani nahatoquiri inanijine Dio huati tajari. Pohua tadsari Moisesi icanahatonijine icadosse-dsa Atti ajama najari: –Ssono

Sinahihuaji timadidsa occa odsa tiadsa nohue ocanade. Najarossa najaro ticanahatoji. Tibodi huatonissa tadsa pina tia mari ocana-jarossa tinanaji –nahi nade Dio Moisesidsa. Nadsapi najaro Dio tadsari canahatohue cajicadsapi nahidsa Diodsa dada toqquimadedeni dsepedeni ijimanajari. Naraha najarideni dsepedeni ijimanajaripa pina memehuari Jeso dsepe ijijarissa nejerani. ⁶Diopa Pohua Bedi Jesodsana cacahuehe denima bica tanicca da inajaro. Ajijaro namidsa Diocca dosseniji tahidecca ecahuamanajaropi ajimani. Najaro Diocca dosseniji tahideccadsa madija: –Jehe, iboraquiri inana –quinadsapa pohnuadenidsa ima bicani tojanijine Dio huati taporaha najaro naqui ajimani tojajaro. Dio tedseje jehe icanirenijinecca ima dsati Jesojine toजारopori ima denima bica tanicca iadsa anijaro. Pocca jehe canireniji dsati denima bica tajaropori Dio Pohua huati tapojaricca denima bica tajarojine. Najaro aji Jesocristo icca daniji Diodsa dada toqquimade, icca ima huahuati toqquimade deni tojahiccapa icca ima Diodsa pajiranissa tanijine ia tonapajira-baqquihissa tahitohui.

⁷Diopa pocca dosseniji tahidecca Moisesidsa da inadsapi *Isaraeri potemahidenidsa huati tajari: –Ohuattidsara iboraquiri tiquinaji –nadsa madija atindenipa: –Jehe, Tettidsa iboraquiri inanitohui –quinajari. *Dio tedseje jehe canirejari. Naraha najaro pocca jehe canireniji madijacca imasiri inajicanijine pajira-jerani. Nassa pajiranissa tadsapi Dio pocca jehe canireniji: –Onihira tojana

–najarahitohuiraha. ⁸Naraha pocca marinajadsa iboraquqiri nahijine pajiramana-jarahi qqui qqui tadsapa Pohua bodi: –Jaho, occa jehe canirenijidsa madija tobicamana-hissa tahijine pajira-jerani nahato onani –najari. Nadsapa Pohua Attia:

–Nidsa occa jehe canirenijicca ima dsati onananijinecca huada bacco tanitohui –nahi nade Dio.
–Najaro huadadsapi Isaraeri potemahideni, Joda potemahideni, najarideni huapimadsa occa jehe canirenijicca ima dsati onananitohui.

⁹Aji jehe canirenijicca ima dsati onananijinepi pina occa jehe canireniji tahidecca pohuadeni potapojaridenidsa onanapojarossa nejeranitohui. Najaridenipa dsama Ejitocca madijadsa nanajidso toqueje-nadsanapo-jarahijine odinibaquijaride.

Pina pohuadeni dsepedenidsa mari odsanabaquidsa joca oninebaquijarissa najaride. Nadsapi occa marinaja pohuadenidsa da onadsa Ohua tedseje jehe icanireraha tohuibomanadsapa onebo-baquijaride –nahi nade Dio.

¹⁰–Occa marinajadsa iboraquqiri nahijine pajiramana-jarahi qqui onadsa Ohuattipi: Isaraeri potemahidenidsa occa jehe canirenijicca ima dsatira onanana, onajaro –nahi nade Dio.

–Nadsama occa jehe canireniji dsatipi ajima nanijine: Pohuadeni bodidsa onananitohui, pina pohuadeni

bodidsa dsodo onajarossa nanitohui, huatideni ajamana-jarahijine.

Pohuadeni Cacahuade Dio ojanitohui, pohuadeni naco occa madija toquejenahitohui.

¹¹Nadsana pohuadeni tesse Ohuatti mittamanahijine mari mari quina-jarahitohui.

Pohuadeni imecotedenidsa, poccadeni madija huapimadsa: “Ia Medsede Dio Atti tichatteraji” quina-jarahitohui.

Madija huapima Ohuadsa noccodeni jidseraquqiri nahitohui. Ohuatti naqui mittamanahissa tahitohui.

Ajamani toquejenajarideni, deni toquejenajarideni huapima Ohuatti mittamanahissa tahitohui.


¹²Pohuadenitohui ohuati huana tadsa poccadeni tabaccorehe sse onadsapi nohueranitohui.

Poccadeni imasiridsa: “Epeje, ohuati ajimani” onadsapi najarodsa obodi huatomapomajeranitohui –nahi nade Dio.

¹³Nadsama Dio pocca jehe canireniji dsati tahimarini huati tadsapa Pohuajine jehe canireniji tahideccapi jadani tojajaro. Nadsapi najaro jehe canireniji jadani tojadsapi ponima tojajaro. Amossi nabote nani.

**Maittaccadsama Diodsa
huatidsemanadsa
ajama quinajari**

9¹Isaraeri potemahideni Diodsa: –Jehe, Tettidsa iboraquqiri inanitohui –quinadsapa najaropi Diocca jehe canireniji tahidecca tojajaro. Nadsapa Dio



Pohuadsa huatidsemanahijine tocahatterahijinepa marinaja huapi tehe pohuadenidsa da inajaro. Pina Pohuadsa imarideni huati iquima-mananijinecca marinaja, pina madijacca daniji Pohuadsa da iquima-mananijinecca marinaja najaro. Najaro marinaja huapimapi Diodsa huatidsemanahijinecca. *Diodsa huahuatidsemana nahicca odsa ajijaro namicca oninipi: –*Dio tadsari – quiquinanajari. ²Nadsama Dio tadsaripi bani etero ssequi nahi ahua dappo nahuajaninidsa ssoque nahuajanijari. Najaro bodidsa coba canahuajanini icanahatomana-jaro. Najaro coba canahuajanini dsotorinihuajipi etero siba tanicca huacossajaro. Huahuacossa que tani tahidehuajipi: –*Dio anihihuaji bica tanicca – quiquinanajari. Najarodsa aniridsahipa jojororo pinine orocce ani, Diodsa

da tahijinecca pan huahuanari ani najaro. ³Nadsapi huahuacossa idenihuajipi denima bica tajaro. Najaro oninipi: –*Dio anihihuaji denima bica tanicca – quiquinanajari. ⁴Huahuacossa bacconihuaji *Diodsa da tahijinecca huahuanari badsira tocanajaro cahittidsajaro. Najaro huahuanaripi huapini nemanehe orodca nepi canajaro. Nanidsa *nahatohui majo bicabote tohuessidsapa majo totoccabacqui najari. Nani idenihuajicca bodidsa naqui *Dio tedseje jehe canirehicca baho cahittidsajaro. Najaro bahopi huapini nemanehe orodca nepi canajaro. Bodidsapi coripissa najaro oro nahatoni anijaro. Najarodsa memehuajicca pan oni *mana cahittidsajari. Araocce dsodsojo moro tanicca naqui nanidsa podsajaro. *Dio tedseje jehe canirehicca dosseniji siba pamehedsa dsodo

nani naqui codidsajaro. ⁵Diocca baho tetepinidsapi Diocca dodosse tabaqqi memehuaajicca corime oro nahatoni pamaha barijari. Baccodeni cacattequimeradsa eppe-deni da caniredsapa baho tetepini odsa icanamanajaro. Pohuadeni pamahapa Diocca deni tojehe cajimanajari. Naraha jidapapi Dio tadsari bodidsa aniridsajarocca ima denima dsodo onejerani, onajaro.

⁶Nadsama Dio tadsari bodicca aniridsajaro huapima najorehe jicanissa tadsapi bodi tahidecca aji Dio anihihuaji bica tanicca quiquinanahihuaji Diodsa dada toqqumadedeni jajahi tojedsima najari huajijiradsa. Nahidsa Diodsa huatidsemanadsapa dsepedeni ihijimana najari. Pina jojororo tohuesside, majojo tohuesside, Diodsa huatide najaro. Huahuacossa etero sibabote bacconihuaji nama nama dsadsanapomana najari. ⁷Naraha huahuacossa idenihuaji Dio anihihuaji denima bica tanicca-dsa toqquedsimadepa Diodsa dada toqqumade deni tojahicca pohua motta ojari naha totoqquedsima najari. Huada ojariedsa toqquedsima, huajano ohuahadsa naco najaro huada bacco tapomadsapi toqquedsimapoma, huajano ohuahadsa toqquedsimapoma nanaja najari. Nama nama dsadsanapo najari. Nahihuaji toqquedsimadsapa bani bedi bicabote emene dsojo dsojo ihicadsima najaro, Dio madija huapimacca imasiridsa: –Epeje, ohuati ajimani –nahijine. Madija huapimacca imasiri manaconijine dsojo icadsimadsapi pohua pocca imasiri manaconijine naqui dsojo icadsimajaro. Madija ssamoquiri

nadsa ima inanamanajarocca imasiri manaconijine naqui Diodsa da da ihinanajaro. ⁸Nadsapi Dio Corimejine iadsa ima ahuato tajaro: Najaroa aji Dio anihihuaji bica tani-cadsa Diodsa dada toqqumade dsepedeni ijimanaccadsapa aja Dio anihihuaji denima bica taniccapi madija huapimadsa huacossaccajaro. Diodsa dada toqqumade deni tojahicca pohua motta totoqquedsima naccajari. Nema nadsapi madija huapima Dio anihihuaji jai tojedsimahijine tohuaba-jeraccani. ⁹Aji Dio anihihuaji madija jai tojedsimahijine huacossaccaropi ia mari canajaro: Diodsa huatidsemanadsa poccadeni daniji onihi onihi da da ihiquimamana naraha najarojine poccadeni ima Diodsa inapajiranissa tanijine ssamo tani. Madija huapimacca imasiri manaconi bani bedi naco da da ihiquimamana naraha najarodsa bodideni tohuirenijine pajira-jerani. ¹⁰Diocca dosseniji tahideccassa inanamanadsapi poccadeni daniji pina jijipa, dsedse, oqui, bani najari da da quiquinanajari. Ima oppina tanicca cajimanadsa naco poccadeni ima toppineranijine Diocca dossenijissa ihinanamana najaro. Dio pocca dosseniji cacajiquimera-jeraccadsa nama nama nanajonamana najari. Najaro dossenijipi amossiniccara, huapideniccara, assiredeniccara inanabicabaquijari. Naraha bodideni tobicahijine jerani.

**Jesocristo pohua emene
da inajaropi pajiranissa
dsanapojaro**

¹¹Naraha jidapapa Jesocristo iadsa anihi. Puhuapa icca daniji

*Diodsa dada toqqumade, icca ima huahuati toqqumade deni tojahicca. Pohuana icca ima Diodsa inanabicanijine pajirahi. Pohuapa memehuajicca Dio anihihuaji toqquedsimajari. Nanihuajipi Dio tadsari bani etero ssequi nahiccas nejerani. Madija icanahatomanajerani. Ajijaro dsamacca jerani. Memehuajiccapi denima bica tani. Pajiranissa tani. ¹² Jesocristo nahihuaji toqquedsimadsapa edede jidsadsa chivo emene dsojocadsima-jarajari. Bohui bedi bicabote emene naco dsojocadsima-jarajari. Pohua pohua emenena da inanijine toqquedsimajari. Toqquedsimahi ojarihi. Nidsa dsotode pohua emene dade toqquedsimapoma-jarahitohui. Pohua emene da inajaropi pajiranissa dsanapohitohui. Nama nadsapa imasiri manaconi najidsohue iadsa ssonarijeranijine ia todinibaquidsapa tossiejehe jiquejeranicca iadsa inanajaro.

¹³ Diocca dosseniji tahidecca aniccadsapi madija ima oppina tanicca inanadsapi Diodsa dada toqqumahuaji toqquedsimade oppina tani. Naraha bani bedi emene dissa naridsa assire ppaja tojadsana pocca ima tobica tani. Ima onihi oppina tanicca toppinera-nijinepi edede jidsadsa chivo emenedsa huissa inarijari. Ima onihi oppina tanicca toppinera-nijinepi bohui maqqi emenedsa huissa inarijari. Ima onihi oppina tanicca aji madija huatiahi assire bara inadsapa bohui dsohuato jierani botta tani ononi passodsaquejemadsa ima cajijari tetepihuaji dissa dissa narijari. Nadsapa assire

ppaja tojadsa pocca ima toppinera tani. Nama nama quiquinana-dsa assiredeni tohuiremanadsapa Diodsa dada toqqumahuaji jai tojedsimapomahijine toppinera-manapomajari. ¹⁴ Nadsama najaro marinajassa inanamanadsa bani bedi emenejine assiredeni tohuiremanadsapa dacorehe cajini ahuato tajaro. Naraha Jesocristo emenena dacorehe denima cajijaro. Dio Pohua Corime camitta taha nama dsanapojari Jeso inadacoradsa icca *daniji bicabote tojahijine pohua ccaccorajari Imehi Diodsa. Jesopa ima cappirajari, bodi huire tajari. Icca imasiripi najidsohue jiquejeranihuaji ia tohuaccanitohuiraha Jeso emene toccajarojine icca imasiri sse inajaro. Ibodi inahirejaro. Nema nadsapi icca Dio camitta tajari Attidsa iboraququiri idsanaponijine ipajirajaro.

Diocca jehe canireniji dsati

¹⁵ Jehe, Jesocristo pohua ccaccoradsa pohua emene toccajarojine pohuana Diocca *jehe canireniji dsati iadsa inanajaro. Aji Diocca jehe canireniji tahideccadsa madija iboququiri nadsapa imasiri ihinanamana najaro. Najaro imasiri manaconi Jeso dsoqquejaripaja. Nama nadsapa Dio pocca madija toquejenahijine icattejidsa-baqquijarideni pocca biquehe jiquejeranicca cajimanasanapohuitohui. Pina Dio Pohua huati tapojarissa inananitohui. ¹⁶⁻¹⁷ Nadsama Jeso dsoqquejarijine Diocca biquehe iadsa tojajaropi pina madija dsoqquedsa pohua dsepetaji bedidenidsa tojajarocca imassa najaro. Aja madija dsepe

sse tajaripa dsoqqe-jaraccadsama ima inanajorapojaro. Pohua dsepe-tajipi bedidenidsa tojanijinecca ima papeodsa dsodo najaro. (Cariacca oninipi: testamento.) Naraha dsepe sse tajari madiccadsapa najaro ima pina ponimassa najaro. Dsoqqedsana pajissa tojajaro. Nadsana bedidenidsa pohua dsepe-taji tojajaro. ¹⁸Najaro imassa najaro Dio pocca jehe canireniji tahidecca madijadsa inanapodsapi bani bedi inanadsoqqe-manadsa emene toccadsana Diocca jehe canireniji pahuadenidsa pajissa tojajaro. ¹⁹Moisesipa Diocca dosseniji nemanehedsa madija mari icana-baqquia jicadsapa ajama najari: Bohui bedi emene, edede jidsadsa chivo emene passodsa icanejema-jaro. Nadsapa bani emene huihuissa inahatojari. Edede cone maccohuidsa coro todsippani macco tajarocca ahua tere tajari oni isopo ininedsa ssoque idsanajaro. Nadsapa huihuissa cote bani emene passodsa quejemanidsa edsippa nadsa Diocca dosseniji dsodo nani huissa huissa naridsajari. Pahuadsa queriqquimanajarideni naco huissa huissa inariridsabaqquijari. ²⁰Huissa huissa naridsadsa huati huati tajari: –Aji bani emenecca imapi Diocca jehe canireniji tiadenidsa pajissa tojajaro. Pohua Attidsa iboraqquri tiquinanijine jehe tiquinapa –najari. ²¹Nadsapa Dio tadsarihuaji naco Moisesi huissa huissa naridsajari. Najaro odsa bodicca naqui huissa inariridsajaro, pina oro nahatoni jojororojine, nahatohui majo bicabote tohuessidsa majo toccabaqquinijinecca huahuanari, huahuanari panjine najaro. Diodsa

huatidsemanahijinecca huapima toppineranijinepi bani emene huissa huissa naridsadsa tohuireridsajaro. ²²Nadsama najaro bani emenecca imapi iadsa ahuaato tajaro: Diocca dossenijidsa huapima toppinera-nijinepi bani emenedsana tohuire-jaro. Diocca dossenijidsa imasiri tomossinijine naqui bani emene toccadsana Dio najaro imasiridsa: –Epeje, ohuati ajimani –najari. Jehe, maittaccadsama bani emene toqqejeradsapi poccadeni imasiri tohuirenijine ssamo taccade.

**Jesocristocca danijipi imasiri
inajicanijine pajiranissa tajaro**

²³Jehe, nadsama memehujicca Dio tadsaripi assirani. Namidsa anijarocca odsapi corimani. Najaro odsa bodidsa aniridsajari huapima Diodsa tohuirenijine bani bedi emene huissa inariridsamanadsa tohuireridsajaro. Naraha memehujicca assirani aja Dio madihihuaji pajissacca tohuireridsanijinepi bani bedi emene pajira-jerani. Nanihuajicca tohuirenijinepi denima bica taniccana pajirani. ²⁴Jesocristopa aji namihuajicca –Dio anihihuaji bica tanicca –quiquinanajaridsa toqqedsima-jarajari. Najaropi madija icanahatomanajaro. Dio tadsari pajissacca corimanira. Pahuapa memehujicca pajissa Dio madihihuajina toqqedsimajari, nahidsa icca ima Imehidsa huati tadsapa Imehi: –Epejena, ohuati ajimani –nahijine. ²⁵Pahuapa Dio madihihuaji toqqedsimadsa naco huajijiradsa pohua emene toccanijine pohua ccaccaccora najarajari. Aja namidsa madijari Diodsa dada toqqumade deni tojahiccapa madijacca imasiri

manaconi bani emene dsojo dsojo ihicadsima najaro. Dio anihihuaji huada ojariedsa toqquedsima, huajano ohuahadsa naco huada ojariedsa toqquedsimapoma, nama nama dsanapojari. Pohua emene jeraraha Diodsa da da ihiquima najaro. Naraha Jesocristopa nama najarajari. ²⁶Huajano huajijiradsa pohua emene toccanijine pohua ccaccaccora najonadsapa nassa dsama nahatoponidsama dsoqqehe tonahanajonanaja. Naraha jidapana dsama jicanicca huada tohuajiradsa iadsa ccaronajari. Dsoqqehejine pohua ccaccorahi ojarihi, icca imasiricca dacorehe inajicanijine. Nama nahi ojari nadsapa apaja. Nama napoma-jarahitohui.

²⁷Madija ia naqui idsoqqenitohui. Idsoqqeraha idsoqqeni ojarinitohui. Najaro nattinipi *madija huapimacca ima cattemade Dio baccokuva idomo huadsa ia tocattejidsabaquihitohui. Pohuadsa toquejenajaridenidsa pocca biquehe da inanitohui, Puhuadsa toquejena-jarajaridenidsapi pocca najidsohue inassonarinitohui.

²⁸Jesocristo naco dsoqqehi ojarijari. Imasiri manaconi pohua ccaccorajari. Pahuajine icca imasiri jicaridsajarodenipi huapi inani. Nidsa ccnipomadsapa icca imasiri manaconi dsoqqepoma-jarahitohui. Puhuatohui imadijaro ia tonassajabaquihijinena ccnipomahitohui.

**Diocca dosseniji tahideccapi
icca ima inapajiranissa
tanijine pajira-jerani**

10 ¹Cristo imasiri manaconi tojahijine tahimariipi pina ajijaro imassa najaro. Aja madija

ccajonadsa majijine corime qqui inapodsapi dsotodena assire ccajonahi nahato inajaro. *Diocca dosseniji Moisesidsa da inapojaropi corimani. Diocca daniji denima bicabote dsotode ccajonanjinepi assirani. Najaro assirani pajissa tojajaropi Jesona paja. Nadsama najaro Diocca dosseniji tahideccapi madija imarideni inapajiranissa tanijine pajira-jerajaro. Madija tahidedenicca Diocca dosseniji ecahuanadsapi poccadeni imasiri manaconi bani bedi emene da iquima-mananijine Dio tadsarihuaji jajahi toja najari. Huajano ojari ojari bani bedi emene da da ihiquimamana naraha najaro danijipi imarideni inapajiranissa tejerajaro. ²Najaro Diocca dosseniji tahideccadsa bodideni tohuirenissa tanijine pajiradsapi nassa pohuadeni bodidsa: –Ojine tabaccora tani. Imasiri ocajini –quinapomajaranaja. Aja bani bedi emene dada naco nebomananaja. ³Naraha ajijaro imana pajissa. Puhudenipa huajano ojari ojaridsa imasiri manaconi bani bedi emene da da dsadsanapomana najarijine bodideni huatohua madimanajari. Bodidenipa: –Imasiri icajini –quiquinanajari. ⁴Jehe, nadsapa bani bedi emene poccadeni imasiri manaconi dada nebomana-jararaha najarods poccadeni imasiri jicanijine pajira-jerajaro.

⁵⁻⁶Nama nadsapa Cristo namihuaji madide ccaronabote nadsa Imehi Diodsa huati tajari:

–Jehe Abi, Tiapi madijadenicca imasiri manaconi bani bedi emene da da ihiquimamana nahijine tohuini tejerajaro.

Jijipa bicahi da da ihiquimamana nahijine naco tohuini tejerajaro.

Bani bedi bicahi siba hua tamaronidsa botta botta quinahijine naco tohuini tejerajaro.

Daniji onihi onihi imasiri manaconi tojanijine caji taraha najaro naqui tohuini tejerajaro. Nohuerajaro.

Naraha poccadeni imasiri manaconi ojanijine ohua pina pohuadeni assiredenissa tinanajarode.

⁷Nadsama ohuattipi: Abi Dio, ohuapi aji ohuani.

Pina otahimari Tetti dsodonanidsa anijarossa onanani-jine occaronajaro.

Tia tohuini tanicca onanani-jine tohuini onajaro

–nahi nade Cristo atti Dabi pocca jijiridsa dsodo inajarodsa.

⁸Diocca dossenijipi madija poccadeni imasiri manaconi bani bedi da da ihiquimamana nahijine icadossebaquipojari. Naraha Cristo huati tajaripa: –Abi Dio madija nama quinahijine jipera tahi –najari. ⁹Pohua atti naco: –Ohuapi aji ohuani. Tia tohuini tanicca onanani-jine occaronajarode –nahi nade Imehi Diodsa. Pohua atti nama najaripa imasiri manaconi bani bedi dade inajicajaro. Manaco pohuajine onihi dsatira inanajaro. ¹⁰Jesocristopa ibora tadsa Dio Pohua jipa tahicca inanajaro. Pohua ime ccacoradsapa icca imasiri manaconi tojajaro. Pocca danijipi ojarijaro. Onihi nohueranitohui. Pohua emene icca imasiri manaconi tojajaropi pajiranissa dsanapojaro. Nama najaria Dio pocca madija



bicaquiri inanijine ia tonanabica-baquijari.

¹¹Nadsama Diodsa dada toqqumadedenipa huada huajjiradsa dsepedeni ihijimana najari. Huajjiradsa imasiri manaconi bani bedi emene Diodsa da da ihiquimamana naraha najaropi imasiri inajicanijine pajira-jerani.

¹²Naraha Jesocristo imasiri manaconi da inajaropi ojarijaro. Najaropi pajiranissa tehe nema dsanaponitohui. Nahi dsotodepa Jeso Imehi Dio madihihuaji toccamacossanidsa deni tojehe cajjari-jine Dio Pohua inori nahatonihuaji huittarijari. ¹³Nahidsapa Imehi Dio huati tapojari tohui madijari. Aja tahide Imehi Attipa: –Nidsarانبote tia huadidedenipa ajamani onanabaquihitohui. Poccadeni dacorehe onajicanitohui –nahi nade. Najaro huada bacco tanitohui madijari. ¹⁴Pocca daniji imasiri manaconi tojajaropi ojarijaro. Najarodsa Diocca madija tobicanajaridenicca ima Diodsa

pajiranissa dsanapojaro. ¹⁵Najaro ima pajissa tojanijine Dio Corime iadsa ahuato inanajaro. Dio Pohua Atti dsodo nanidsa ajima najaro:

¹⁶ – Occa dossenijidsa iboraquiri nahijine pajiramana-jarahi qqui onadsa

Ohuattipi: Isaraeri potemahidenidsa occa jehe canirenijicca ima dsatira onanana, onajaro –nahi nade Dio.

–Nadsama occa jehe canirenijidi dsatipi ajima nanijine:

Pohuadeni bodidsa onananitohui. Pina pohuadeni bodidsa dsodo onajarossa nanitohui, huatideni ajamana-jarahijine.

¹⁷Pohuadenidsa: Epeje, ticcadeni imasiri ohuati ajimani. Ticcadeni tabaccorehedsa obodi huatomapoma-jeranitohui, onajaro –nahi nade Dio.

¹⁸Nadsama poccadeni imasirdsa Dio huati ajamadsapa imasiri manaconi bani bedi emene dade jicajaro. Najaro ima jicadsapi denima nohueranitohui.

Diodsa iajiressina, Pohuadsa jehe idsanapona

¹⁹Jehe ohuemecotedeni, Jesocristo dsoqquedsa pohua emene toccajarojine Dio anihihuaji jajjedsimanijine toppinerani. Toppineradsapi jidapana icappina-jeradsa Diodsa iajiressinijine ipajirani. ²⁰Jeso dsoqquehijine pohua assire ccaccoradsapa Diodsa bacco inanijine icca jahui inahabajaro. Aji maittaccadsama Dio anihihuaji denima bica tanicca quiquinanahihuaji etero siba tanicca huacossajaro. Najaro huahuacossa inahabajarossa najaro Jesopa jahui

dsati camittehe icajinijinecca iadsa inahabajaro. ²¹Pohuapa icca daniji Diodsa dada toqqumade, icca ima huahuati toqqumade deni tojahicca. Diocca odsacca madija Cacahuade tojajari. ²²Nadsama ia Cacahuade Jeso icca jahui inahabadsapi Dio Pohuadsa iajiressina, onajaro. Ibodi maidsera inadsa Diodsara pajissa inanissa tadsa Pohuadsa iajiressina. Jeso emenejine ibodi tohuiredsapi tabaccorehe jirehe Diodsa iajiressina. Icca imasiri jicani ahuato tanijine naqui passodsia ia essire topa dsanadsapi Diodsa iajiressina, onajaro. ²³Diopa maidsera tahi. Ima bicani iadsa inananijine huati tapojaripa pajissa najarossa inananitohui. Nadsapi etti johuidso tejeradsa: –Pajissa nitide, pajissa jeranitide –inejerana. Ettiipi: –Jehe, Dio Pohua Attissa inananitohui. Pocca biquehe iadsa inananitohui, pajissa –inana. Nema inadsapi najaro tohui imadina. Nadsapi dacoco iijirana, najarodsapa pajissa idsanaponijine. ²⁴Jari, tibodideni huatoma-manaji.

¿Nejecoma inadsa imecote bodideni acco icamabaqquihijine? Pina huatideni cahanerara canahijine, ima bicanira inanamananijine naqui bodideni acco acco ihicamabaqqui nana. ²⁵Ima onihi naqui Dio Pohuadsa ihiqueriqui dsanapojaro inebojerana. Pina aja motadeni neneboqqumana najaridenissa inejerana. Iapi huajijiradsa icatidserara canaridsana. Ia Medsede ccanibote nahi. Dio madija huapimacca ima icattemanijinecca huada bacco tabote nani. Nema nadsapi denima icatidserara canaridsana, onajaro.

²⁶Ohuemecotedeni, icca imasiri manaconi Jeso dsoqquejari

tahimari pajissa tojani nahatoqquri inajaro. Naraha najaro ima bicani pina ponimassa inanadsa imasiri inana-dsanapodsapi nidsa Dio iadsa: –Jehe, occa ejedeni Jesojine ticcadeni imasiri jicajaro –najarahitohui. Imasiri nema inanajaro manaconi da inanijinepi onihi nohuerajaro. ²⁷Nadsapi ima oppina tanicca iadsa aninitohui. Diocca najidsohue jororoni pporajaro iadsa naqui ssonarinitohui. Najaro najidsohuedsa pocca huadideni huapima inajicaridsahitohui. ²⁸Eti ajima-gerana. Diocca dosseniji Moisesidsa da inajaropi dacorajaro. Madija najaro dossenijidsa ibo tadsa imasiri inanani qqui toquina-dsapa ima cacattemadehuaji pohua joca quina tahi. Nadsapa madija ima tonanajari ima cacattemade baccuhuaji inahuamanadsa aja qqui toquinajarideni pamaha, 3 nahitide pocca ima huati toquinajari. Nadsapa ima cacattemade atti: –Jehe, dsoquena –nadsapa huatideni huaneraqquri nadsa inanadsoquemana tahi. ²⁹Nadsapi najaro imasiri inanajaro manaconi oppina tani inaraha Dio Bedi ettajohui manaconipi denima oppina tani. Madijapa Jeso ttai ttai inanajarissa nadsapa pohuadsa najidsohue oppina tanicca ssonarinitohui. Aji Jeso emene toccajarojine Dio pocca jehe canireniji dsati iadsa tojajaro. Najarojine icca imasiri jicadsapi icca ima Diodsa tobicajaro. Dio Corime iadsa huati huana tadsa ia accode jipa taraha madijapa Jeso emene ponima inanadsapi Dio Corimedsa naco ima inanajaro. Nidsa dsotode najaripa najidsohue cajihitohui. ³⁰Najaro

ima nahatoqquri inajaropi Dio Atti dsodo nanidsa dsodo napojaro:

–Tabaccorehe inanamanajaro manaconipi Ohuana paji. Ohuana pohuadenidsa tabaccorehe manaconi onassonarinitohui –nahnade Dio.

Pohua Atti naco:

–Ohuapi pohuadeni Cacahuade Dio. Occa madija ocattejidsa-baqquihitohui. Bicaqquri najaridenidsa occa biquehe da onanitoqui, tabaccoraqquri najaridenipa onajidsobaqquihitohui –nahnade Dio.

³¹¡Jaho, Dio camitta tajari dsepedsa iquejenanipi oppina tani! Pocca najidsohue inahananijine ipajirajerani.

³²Tibodideni huatoma-manaji. Tahide Jesocristo tahimari timittamanapodsapi pohuadsa tiquejenararojine ima ocassera tanicca onihi onihi tiadenidsa ssonari ssonari najarode. Naraha dacoco tijradsa tinahanamana tinahanamana najarode. –Epejena, Dio onebona –titiquina nejerade. ³³Tiadeni motapi tamassohue tinahanamanajaro, najidsohue naqui tinahanamanajaro. Tiadeni nama tonanabaqqui-manadsapa madija huapima qqui qqui totoquina najari. Titessedenidsa tabaccorehe inamanadsa naqui pohuadeni tedseje ocasserani temanajaro. ³⁴Jesodsa jehe quinajarideni toponi cocorohuaji huedsamanadsapa tohuideni tetideni huanacquiri nadsa acco acco titicamabaqquimana nade. Tidsepedenitaji inaccamanadsa naqui tetidsemanadsa: –Epeje, tinaccamanaji –tiquinade.

Titedsejemadenicca ima nahatoqquiri tiquinadsapi: –Epejeni, memehujina denima bica tanicca, jicaquera tanicca icajinitohui –titiquina nade.

³⁵Nadsapi tiadenidsa ohuattipi: Diodsa jehe tiquinajaropi tinebomanajeraji. Diodsa jehe tiquinanissa dsanapodsapi Diocca daniji bica tanicca tiadenidsa tojanitohui. ³⁶Dacoco tijiraji, Dio Pohua tohuini nahiccassa tinanamana-dsanaponijine. Ocasserani temanadsapi nema nehe tinahanamanaji. Nema tiquinadsapi Dio Pohua huati tapojaricca ima bicani tiadenidsa inananitohui. ³⁷Aja Jeso ccanipomahijinecca imapi Dio Atti dsodo nanidsa ajima najaro:

–Itohui ccanipomahijinepa pajissa ccanibote nahi.
Ccanide najo-jarahitohui.

³⁸Occa madija bica tajaripa pohua bodidsa: “Pajissa Dio Pohua Attissa inananitohui” najari. Najaro jehenijima madi-dsanapohuitohui.

Naraha dsotode Ohua nebosda pocca imabotedsa todsodonsapsa pohuadsa ohuatidsejeranitohui –nahi nade Dio.

³⁹Naraha iapi pina poccadeni imabotedsa todsodoni-manajari-denissa inejerani. Najaridenipa Dio inajidsobaqquihitohui. Naraha iana Diodsa jehe inanissa tadsapi Dio ia tonassijabaqquihitohui.

Diodsa jehe quinahissa tajari tahimarideni

11 ¹Diodsa jehe inanissa tadsapi: –Diopa Pohua Attissa inananijine pajirahi –inajaro. Nema inadsapi pajissa iadsa

tojanijine tohuini imadijaro. Iadsa huati tapojaricca qqui inejeraccaraha nidsa iadsa tojanijine ibodidsa nahatoqquiri inajaro. ²Maittaccadsama icca idideni Diodsa jehe quinahissa tadsapa Dio pohuadenidsa: –Tiadenipi ohuadsa bicaqquiri tiquinani –najari quinade. ³Ia naqui Diodsa jehe inanissa tadsapi Dio Pohujine meme nami huapima inahatoridsapojaro nahatoqquiri inajaro. Pohujine nahatoridsani qqui inajaro huapimapi nohueraporaha Pohua Attidsa inahatoridsajaro.

⁴Maittaccadsama Abeopa Diodsa jehe nahissa tajari. Nama nadsapa pocca daniji Diodsa da inajaropi bica tajaro. Naraha pohua imecote Cainocca danijipi bica tejearajaro. Abeocca danijipi denima bica tajarojine Diopa: –Jehe, pocca daniji ohuadsa tojana –najari. Nadsapa Dio Atti naco: –Abeopa bica tahi. Pocca ima naqui pajirani-ssa tani –najari quinade. Nadsama Abeopa maittaccadsama dsoqueporaha pocca jehenijina iadsa huati huati dsanaponipaji najaro.


⁵Maittaccadsama *Enoco naco Diodsa jehe nahissa tadsapa huati-ajarajari. Camitta taha Dio iaccamacossanijari. Nadsapa ajijaro namidsa assire bacco quina-jarajari. Pohua tahimari Dio Atti dsodo nanidsa dsodo napojaropi Enoco Diodsa ibora tadsa pohujine Dio huahuatidse nadsapa Dio pohua iaccamacossanijari quinahi nade.

⁶Ia naqui Diodsa jehe inejeradsapi ijine Dio huatidsehijine ssamo tani. Madija Diodsa tohuajiressihijine tohuini nadsapa tahide pohua bodi: –Jehe, Dio anih. Pohuatohui

quinajaridenidsa pocca biquehe
da ina tani –napodsana Diodsa
tohuajiressihijine pajirahi.

⁷Maittaccadsama *Nohue naco
Diodsa jehe nahissa tajari. Pohua-
dsa oppinehe tahimarinini Dio
huati tajari: –Najarodsa huapima

onajicaridsahitohui –najari.
Madija huapimapa nema nanicca
qqi toquinapo-jararaha Nohuena:
–Pajissa Diopa Pohua Attissa inana-
nitohui –najari. Nadsama Nohuepa
pocca madija tocassiejerahijine
canoa imenibote icanahatojaro,



pina Dio pohua icadossejari-ssa inanajaro. Dio Attidsa pajissa nadsapa ajijaro namicca madijadenidsa: –Dio Attidsa pajissa tiquinejeradsapi tijicanitohui –najari. Dio naco Nohuedsa: –Ohuadsa pajissa tanissa tadsapi tia onassiajanitohui –najari. Nadsapi ppani ccajonadsa Nohue pocca madijapa tocassiejera-jari. Naraha madija huapimapa Dio-cca najidsohuedsa tojicajari.

⁸Maittaccadsama *Abarahao naco Diodsa jehe nahissa tajari. Pohuadsa Dio huahua nadsapa Pohua Attidsa ibora tajari. Pohuadsa Dio Attipa: –Ajijaro dsama tinebodsaticcaji. Dsama onihi tiadsa nohue onanitohui. Najaro dsama tiadsa, tipotemanidenidsa da onanitohui –najari. Nadsapa pohua toccahihuaji ssamo taraha pocca dsama inebodsaticcaji. ⁹Abarahaopa Dio Attidsa jehe najarijine Dio huati tapojaricca dsamahuaji bacco tadsapa pocca toja-jeraccaraha nahidsa madijari. Najaro dsamacca madija pocca madija jararaha pohuadenidsa quejemamanaha madimanajari. Abarahaopa pocca odsa coro ssequi nahidsa madiridsajari. Pohua bedi Isahaca, pohua jinodi Jacobo naco nama naridsamanajari. Najaridenidsa naco Dio huati tapojari: –Tiadenidsa ajijaro dsama da onanitohui –napojari quinade.

¹⁰Abarahaopa odsa nema naniccadsa madiridsapojaripa nidsa dsotode memehujicca odsa panani bicani totabaccorarera taniccadsa madihijine tohuini bodi huato-dsanapojari. Najaro odsa pananipi Dio nahato tadsa inahatojaro.

¹¹Abarahaopa Diodsa jehe nahissatajarijine pocca amoneje Sara

tadsajani ejedeni jiraha jadahi tocajamanahissa taraha Dio Pohuajine ejedeni cajimanajari. Abarahao dsa Dio Attipa: –Ojine tipotemani tohuapihitohui –najari. Nadsapa Abarahao pohua bodidsa: –Diopa Pohua Attissa inananitohui. Dsori tejeranitohui –nadsa pohuadsa Diocca dacorehe inanadsapi ejedeni cajimanajari. ¹²Nadsapa Abarahao jadahi tocajahissa taraha bedi cajidsapa najari potemahidenina tohuapijari. Pina abadsico bedi huapi tajarissa quinajari, pina passo imeni inidicca ssiqui nemanehessa quinajari. Tohuapi-dsanapodsapa onideni hua quinahijine ssamo tani.

¹³Abarahao, Isahaca, Jacobo-denipa Dio pohuadenidsa huati tapojaricca qqui toquina-jaradsa jicapojari. Qqui toquina-jararaha bodideni: –Dio iadsa Pohua Attissa inananitohui –quinajari. Pohuadenipa huaji tanidsa ccajonani qqui toquinajarissa quinadsa attidenipa: –Nidsaranibote iadsa bacco najonanitohui –quinadsapa huatidsemanajari. Pohuadeni bodidsa nahato-qquiri nadsapa: –Ajijaro dsamadsa imadiraha dsama onihicca madijassa inajaro. Ajijaropi icca dsama jerani. Ajijaro dsamadsapi issoniqquimanitohui –quinajari. ¹⁴Jehe, madija attideni nama quinajaridenipa iadsa ima ahuato inanamanajaro. Pohuadenipa poccadeni dsama tojanijine tohui qqui naridsamanaccajari.

¹⁵Abarahaodenipa poccadeni dsambote tohuini bodideni huahuatomanana najarajari. Poccadeni dsambote tohuini quinadsapa jai tojanihijine pajiramanaraha. ¹⁶Pohuadenipa memehujicca Dio madihicca dsama denima bica tanicca tohuini

quinajari. Nama quinajarijine Diopa Pohuadsa: –Abarahaodenicca Dio –quiquinanahijine comehi tajara-jari. Nama nadsapa odsa panani memehujicca pohuadenidsa inananorajaro.

¹⁷⁻¹⁸Abarahaopa Diodsa jehe nahissa tadsapa Pohua Attidsa ibora tajari. Dio Abarahaodsas huati tapojari: –Ticca ejedeni Isahaca potemahidenidsana: “Abarahao potemahideni” onanitohui –napojari. Naraha dsotode Abarahaocca jeheniji nattome inajaro. Pohua Attipa: –Abarahao, ticca ejedeni ohuadsa ticca daniji teccorajo. Ohuadsa da tadsa ono tojahissa tahijine –najari. Nadsapa Abarahao pocca ejedeni ojariraha Diodsa eccorajari, ono tojahijine. ¹⁹Abarahaopa nahato tajari: –Diopa madija dsoqquejari inahatonihijine pajirahi –najari. Nadsapa Abarahao bodi nama najarijine pocca ejedeni tossiajajari. Nadsapa pocca ejedeni dsoqque-jararaha pohua tahimariipi pina dsoqque nahatoni najarissa najari, inajaro.

²⁰Maittaccadsama Isahaca naco Diodsa jehe nahissa tadsapa pohua bedi pamaha *Jacobo Esaho tedsejemadenicca ima huati tajari: –Diopa tiadenidsa ima bicani inananitohui –najari. ²¹Jacobo naco Diodsa jehe nahissa tadsapa pohua dsoqquehicca huada tohuajirajonadsa pohua jinodi Josecca ejedeni pamaha pohuadeni tedsejemadenicca ima huati tajari: –Diopa tiadenidsa ima bicani inananitohui –najari. Nadsapa pocca pidsodsa pohua tocahuejidsa nadsa Diodsa huatidsejari.

²²Jose naco Diodsa jehe nahissa tadsapa pohua dsoqquehicca huada

tohuajirajonadsa pohua imecotedeni aja Isaraeri potemahideni quiquinanajaridenidsa pohuadeni tedsejemacca ima huati tajari: –Jidapana Ejitohuaji timadimancaraha nidsa dsotodepi Diojine jai tijenenitohui. Nadsapi otone naqui dsojo tinanimanana, icca abicca dsamabote Canahadsana ppa tidsanimananijine –napohui nade huatia-jaradsama.

²³Maittaccadsama Moisesicca abi amideni naco Diodsa jehe quinahissa tadsapa poccadeni ejedeni inajimanajari. Pohuadenipa: –Dio icca ejedeni ecahuahitohui –quinadsapa dsama Ejitocca taminecca dosseniji noppineni cappinamana-jarajari. Taminecca dossehepi: –Isaraeri potemahidenicca ejedeni maqquideje tossonamanadsapa totojica nana –nanaja najari quinade. Naraha *Moisesi tossonadsapa pocca abi amideni: –Icca ejedeni bica tahi, dsoqque-jarana –quinadsapa abadsico huatimade tocajari naha inajimamanajari.

²⁴Moisesi biji ccaradsapa Diodsa jehe nahissa tajari. Tossonapohuipa Ejitocca tamine bedenicca medse tojaporaha napidsapa pohuadsa: –Tamine bedenicca medse –quinahijine jipera tajari. ²⁵Pohuadsa ajijaro namicca imapi imasiri. Najarodsas huatidsehijine jipera tajari. Najaropi jicaca tani nahato tajari. Pohuapa Diocca madijadsama najidsohue tonahana-hijinena pohuadsa bica tajaro.

²⁶Moisesipa Diocca madija tedseje pohuadeni Idinide Cristo ccajonahi tohui madimanajari. Najarojine ocasserehe inahanamanajaro. Naraha Moisesipa pohuadsa Diocca

biquehe tojanitohui nahato tapojari. Najaro tohuira madidsapa dsama Ejitocca biquehe tohuini najarajari. Diocca biquehena pohuadsa denima bica tajaro. ²⁷Moisesipa Diodsa jehe nahissa tadsa Ejitodsa nebotsapa toccajari. Ejitocca taminecca huadie noppineni cappina-jarajari. Diocca dossenijissa inananijinena dissera tajari. –Epeje onana –najarajari. Ia Cacahuade Dio ahuatora taraha Moisesipa pina Dio qqui tajari-ssa nadsa pocca dossenijidsa ibora tajari.

²⁸Moisesipa Diodsa jehe nahissa dsanapodsapa ejete *Pascoa inahatopojaro. (Pascoa ettidsapi: Dio tossoniqquimajari, inajaro.) Moisesipa pocca madija Isaraeri potemahideni icadossebaqqijari, poccadeni noccobiji inidicca ahuadsa edede emene sse naridsamanahijine. Nama quinsadsapa Diocca dodosse memehujicca madija nanajicade ccajonadsa poccadeni ejedeni maqquideje tahidecca inajica-jarajari. Poccadeni odsadsa tossoniqquimajari. Naraha dsama Ejitocca madijadenicca odsadsa edede emene nohueradsapa huapimacca ejedeni maqquideje tahidecca inajicajari.

²⁹Dsotode Isaraeri potemahideni Diodsa jehe quinahissa tajari. Dsama Ejitodsa jahininedsa jai tojadsapa coridsa imeni onini Mar Rojocca passo Diojine carobedsa nami joco tadsapa jai tojeqquimahissa tajari. Naraha Ejitocca soldadonenipa coridsa bacco toquinadsa: –Jina, nema nehe quidso inabaquina –quinadsapa huapima je tocaniredsa tojicajari.

³⁰Isaraeri potemahideni Diodsa jehe quinahissa dsanapodsapa

Pohua Attidsa iboraqquri najari. Nadsapa odsa panani Jericocca siba hua nahuajanini idenihuaji jai huajani, jai huajani, jai huajani dsanapodsapa huada 7 nehe bacco tadsapi Diojine siba hua nahuajanini barari-ridsadsa cojo nahuajanijaro. ³¹Rahaba naqui huananariraha Diodsa jehe nanissa tadsapi odsa panani Jericocca madija Diodsa iboqquri najaridenidsama dsoqque-jerajaro. Ponipi aja Isaraeri potemahideni pamaha Jericohuaji noccodsade huedajonapodsapa pohuadeni acco icamabaqqijari. Nadsapa siba hua nahuajanini Diojine bararidsa cojo nahuajandisapi Isaraeri potemahideni jai tojedsimadsapa Jericocca madija huapima inajicabaqqi-manaraha Rahaba ponina dsori tajaro.

³²A, Diodsa jehe quinahissa tajarideni huapi tade. Najarideni huapima tahimarideni dsodo onanijine opajira-jerani. Pina Jedeo, Baraca, Sason, Jepete, *Dabi, Samohue quinajaridenicca, Dio Atti cacomeraqquri najaridenicca naqui huapima tahimarideni bica tade. ³³Najarideni huapimapa Diodsa jehe quinahissa tajari quinate. Ohuahadenipa jadsiredsa dsama onihicca madijadsa deni toquejenajari. Ohuahadenipa pina Dio Attissa inanamanadsa imarideni icattemamanadsa inapajiramananissa tajaro. Ohuahadenipa Dio huati tapojarissa najaro pohuadenidsa tojajaro. Ohuahadenipa dsomaji ajarideni pina moda inaridsajarissanadsa dsori tocanirejari. ³⁴Ohuahadenipa dsippo jororoni ppocoraraha pohuadenidsa pina ohuijarossa nadsa imedeni camana-jarajari.

Ohuahadeni naco jadsirecca massitodsa dsoqquemana-hitohuiraha dsori tocanirejari. Ohuahadenipa tojaparimanaraha Diojine todacoremani-manajari. Todacoramandsa jadsire inanamanadsapi poccadeni huadidenidsa deni toquejenajari. ³⁵ Amonejedeni naqui Diodsa jehe quinanissa tadsa ponidenicca madija dsoqqueமானadsapa Diojine camitemmani-manajari.

Ohuahadenipa todsepe toquejenadsa najidsohue ihinahana-manana najaro. Dio inebomandasa nanajidsodedeni tappa inabaqquimanahijineraha najaro tohuini quina-jarajari. Bodideni nahatoqquri napodsapa: –Epeje, idsoqquedsapi inahatoninitohui. Nadsana madie denima bica tanicca icajinijine –quinajari. Najarotohui mohuaradsa najidsohue ihinahana-manana najaro. ³⁶ Ohuahadeni naco momohua inanabaqquimanajari, itacossimanajari, bijideni, issodeni cadenadsa jore inaridsabaqquidsa toponi cocorodsa coro coro ihidsimabaqquimana najari. ³⁷ Ohuahadenipa sibadsa iquinabaqqi-manadsapa tojicajari. Ohuahadenipa huihuissidsa huissi ippiridsamanadsa tojicajari. Ohuahadenipa jadsirecca massitodsa itahuajinamanadsa tojicajari. Ohuahadenipa etero cajicamandasa edede etero, cabra etero ssequi quinadsa huehuedsamana najari. Cappiramanahissa tajari. Nanajidso toquejenadsapa tohuati nahanaqquri najari. ³⁸ Diodsa jehe quinahissa tajaridenipa ajijaro dsamacca madija tabaccoraqquri najarideni tedseje quejemamanahijine ssamo tani. Nadsapa Diodsa jehe

quinajaridenipa dsama huamoni-huaji, ssono caji tanihuaji jajahi tojabaqquiridsa najari. Odsa cappiramanadsapa ssonocca odidsa mamadiridsamana najari.

³⁹ Najarideni huapima Diodsa jehe quinahissa tadsapa Dio pohuadenedisa: –Bicaqquri tiquinani –najari. Dio nama naraha pohuadeni madimanadsa Pohua huati tapojaricca nemanehipi pohuadenidsa da inejerajaro. ⁴⁰ Pohua huati tapojaricca ima pohuadenidsa da inejerajaropi itohui bodi huatojari. Iadsa naqui Pohua huati tapojaricca inanantohui. Aja Diodsa jehe quinapojaridenipa jicaporaha iadsama Dio huati tapojaricca cajimanahitohui. Nadsana pohuadeni, ia huapima itassaqquidsa Pohua huati tapojari bicabote iadsa tojaridsanissa tanitohui.

Jeso tohuira icattomama canana

12 ¹ Jehe, Diodsa jehe quinapojaridenipa huapi tade. Najaridenipa jicaporaha pina inoridsa domodeni huahuajani-jarissa nadsa poccadeni jeheniji iadsa nohue quinajaro. Nadsapi ia naqui pohuadenissa inananjine ajima inana: Icca jehenijidsa mohua mohua najaropi inebona. Imasiri naqui inebona. Ajijaro namidsa imadiccadsama Diodsa jehe inanissa tadsa imadi-dsanapona. Dacoco ijirana. Pina madija ittomedsa joppa tajarissa inana. Joppade diarahijine pocca etero huapicca ssiti, ohuaha ccanaja tahicca inebo nadsa joppa tajari. ² Pohua tedsejemara tocattadsa paja joppa tarihi nadsapa jicaqquinihuaji

tacco tajari. Ia naqui Jeso tohuira icattomama canana. Puhuapa icca jeheniji jinede. Puhuapa tahide Diodsa: –Jehe Abi, Tettissa tinananijine tipajirani –napojari. Puhujine icca jeheniji pajirani-ssa tajaro. Jesopa Imehihuaji toccamacossanidsapa huatidsehe imeni cajihitohui nahato tapojari. Najarojine *ahua porimacossanidsa dsoqqehe inahanajaro. Aji ahua porimacossanidsa idsoqqenijinepi oppina taraha puhuapa cappinajaradsa pohua ccaccorajaride. Nadsapa pajissa nahatonidsa Imehihuaji toccamacossanidsapa madija cacahuade tojahijine Dio Puhua inorihuaji huittaritari.

³Nadsama Jeso ocasserani ahujari tahimari tibodideni huahuatoma naji. Imasiri sse-qquri najarideni pahuadsa tabaccorehe inanamanaraha nama naha tonahanajari. Tiadeni naqui tabaccorehe tinahanamanadsapi: –Tocasserani nani. Ohuapi epejena –tiquinejeraji. ⁴Jesopa tabaccorehe tonahanadsa dsoqqejari. Naraha tiadenipi tabaccorehe tinahanamanadsa tidsoqqeje cama-jeraccani. Nadsapi dacoco tijiraji, onajaro.

**Diopa pocca ejedeni johua
icanabaqqui tahi**

⁵Tiadenipi Dio pocca ejedeni tiquejenaraha pocca ima huati tapojaricca tetideni ajimamanajaro. Najaropi Dio Atti dsodo nanidsa dsodo napojaro: –Dsabisso, tiadsa ohuati huana tani. Ima bica tanicca tiattanijine tia Medsede tia mari canadssapa: “Omittejerana, poni” tejeraji.

Tia johua canadssapa naco oji tejeraji.

⁶Ia Medsede pa madijadsa huati cahanari canadssapa mari icanabaqqui tahi. Najaridenidsana: “Occa ejedenideni” najari. Tabaccorehe inanamanadsapi johua icanabaqqui tahi. Inahattabaqquihijine inajidso-
baqqui tahi
–nani nade Dio Atti dsodo nanidsa.

⁷Nadsapi tiadenidsa Diocca najidsohue ssonaridsapi mohuara-
dsa tinahanamanajari. Diopa tiadeni-
dsa: –Occa ejedenideni –nadsa
ticahatteranijine tiadeni johua
tocanabaqquijari. Jari, tibodi-
deni huatoji. Ejedeni tabaccorehe
inanadsapa ¿imehi johua icana-
jaraco? Johua icana tahi. ⁸Diopa
pocca ejedeni tocahatterahijine
huapima johua icanabaqqui tahi.
Naraha Dio tia johua cana-jara-
dsapa pocca ejedeni tija-jerani.
Tiapi pina ejedeni imehi huajima-
cca bedissa tajaro. ⁹Ia naqui tahide
ejedeni iquejenadsa aja namicca
icca abidenipa tabaccorehe inanani
qqi toquinadsa, mittamanadsa
naco ia johua tocanabaqquimana
tade. Nadsapi icca abideni noppine
icappinadsa attidenidsa iboraqquri
inade. Ejedeni nama quinahijine
bica tani. Nadsapi ia naqui icca
Abi memehuaji madijari noppine
icappinadsa Puhua Attidsa ibora-
qquri inadsana denima bica tajaro.
Nema inadsapi camittehe jique-
jeranicca icajinitohui. ¹⁰Ejedeni
iquejenaponipi namicca icca
abidenipa: –Ajima inadsana icca
ejedeni madimanahissa tahijine

bica tani –quinadsapa iadsa johua johua quinaraha poccadeni johuaniji pajiranissa tejerajaro. Naraha Abi Diocca johua canehena pajirani-ssa tajaro. Najarodsapa ibicadsanapodsapi ibodi tohuirenijine, pina Pohua bica tajari bodi huire tajari-ssa inanijine. ¹¹Naraha johuaniji iadsa ssonaridsapi etidse-gerani. Ocassera tani. Naraha icca tabacorehe nebode iattadsapi icca madie tobicanitohui. Jonequiri inehe imadidsa ima bicanira inanadsanapojine.

**ICCA MADIE BICA TANIJINE
DISSERERA INANA**

¹²ICCA MADIEPI PINA ITTOMEDSA JOPPA INAJAROSSA NAJARO. JOPPA TIQUINADSA JA TIQUEJENADSAPI TIPITODENI TOJAPARIRAHA NEMA NEHE DENIMA JOPPADA DACOCO TIJIRAJI. NAJARO IMAPI DIODSA PAJI JEHE TIQUINARINI DSANAPONIJINE DACOCO TIJIRAJI. ¹³JAHUI BICANIHUAJIRA JAI TIJAJI. NADSAPA TINATTIDENI JODSI JODSI TAMISSAMANAJARIDENI JAI TOJAMISSAHISSA TAHIJINE. AMORIDENI PITI TOQUINAPOMA-JARADSAPA TONOMI-MANAHIJINE. NAJARO IMAPI TICCADENI JEHENIJI TOCCANISSA TADSAPI MADIJA OHUAHADENI NACO PINA TICCADENI JEHENIJISSA QUINAHIJINE.

¹⁴MADIJA HUAPIMADSA JONE-QUQUI TIQUINEHE TIMADIMANANIJINE DISSERAQUQUI TIQUINAJI. TIBODIDENI HUIRE TADSA, IMASIRI JIREHE TIMADIMANANIJINE NAQUI DISSERAQUQUI TIQUINAJI. TIBODIDENI HUIRE TEJERADSAPI IA MEDSEDE DIO QUQUI TIQUINA-JARAHITOHUI. ¹⁵TIMECOTEDENI DIODSA JEHE QUINAJARI ACCO TICAMABAQUUMANANA, DIODSA APAJA QUINA-JARAHIJINE. APAJA QUINADSAPA

DIODSA DANIJU TOHUATI HUANEHE DSORI TOCANIREHITOHUI. DIO ATTIDSA BODI NACASSERA TAJARIPA TIADENIDSA QUEJEMA-JARANA. NAJARIPA PINA AHUA BIDABOTE JABO BIDENESSA NAJARI. POCNA NACASSEREHE TIADENIDSA DSAPATORANA. ¹⁶AJA MAQUQUIDEJE AMONEJE HUANANEHE CAJIMANAJARIDENI NACO TIADENIDSA QUEJEMAMANA-JARANA. MADIJA DIO NOPPINE CAPPINAMANA-JARADSA DIODSA DOSSENIJI PONIMA INANAMANA TANI. NAJARIDENI NACO TIADENIDSA QUEJEMAMANA-JARANA. PINA MAITACCADSA MA ESAGO DIODSA DOSSENIJI ECAHUA-JERADSA PONIMA INANAJAROSSA QUINADSAPA BICA TEJERANI. ESAGOPA TAHIDE TOSSONAPAJARI. NAMA NADSAPA IMEHI DSOQQUEDSA DSEPETAJIPI POUADSANA TOJANIJINERAHA ESAGO PEMIHISSA TADSA JIPI MANACO POCNA ESODSA DA INAJARO. ¹⁷DSOTODEPA ESAGO IMEHI-DSA HUATI TAJARI: –ABI, OTEDEJEMACCA IMA BICANI OHUADSA HUATI TINAJI –NARAHU IMEHIPI BEDI ATTIDSA HUATTAJU TAJARI. ESAGOPA NAJARO TOHUINI OJI OJI NARAHU POUADSA TOJANIJINE SSAMO TAJARO.

DIODSA IAJIRESSINIJINECCA IMA

¹⁸TIADENI DIODSA TIAJIRESSIMANAJARUPI PINA MAITACCADSA ISARAERI POTEMAHIDENI SSONO OPPINA TANIHUAJI TOHUAJIRESSIMANAJARISSA NEJERANI. POUADENIPA SSONO SINAHIHUAJI TOQUERIQUUI-JARI, NAHIDSA DIO MOISESIDSA HUATI TAHIJINE. NAJARO SSONO TETEPIDSAPI JORORONI, DSIDSINI, ESENI SOHUE TAJARO, JOJODE CCAHUAJANINI CANAJARO ANI NAJARO. AJA ISARAERI POTEMAHU POUADENI NOCCODSA QUQUI TOQUINAJARI HUAPIMA POUADENIDSA OPPINA TAJARO. ¹⁹TIADENI

Diodsa tiajiressimanajaropi pina Isaraeri potemahideni mohuini oppinabote mittamanajarissa najaro timittamana-gerani. Pohuadenipa jeije mohui dacorajari jei jei nadsa Dio huati huati tajari Atti mohuini oppina tajaro mittamanajari. Pohuadenidsa oppina tadsa oji oji quinadsapa Moisesidsa huati toquinajari: –¡Apaja tinanajo! Denima huati huati tajarana. Imittanijine oppina tani –quina-jari nade. ²⁰Dio pocca dosseniji mittamanadsa naco najarossa inanamananijine pajiramana-jarajari. Pocca dossenijipi ajima najaro: –Madija ajijaro ssono tajodsapa, bani bedi naco ssono tajodsapa sibadsa, huahuajinadsa titinana-dsoqquemana nana –najari nade Dio. ²¹Pohuadeni huapimapa oppina tanicca qqui toquinadsa cappinamanajari. Moisesi pohua naco cappinadsa attipa: –¡Ocappinajaro, ohuisso tacca-cca canani! –najari nade.

²²Naraha tiadeni Diodsa tiajiressimanajaropi ssono *Siohuaji tiqueriquijarossa najaro. Najaropi memehuajicca odsa panani *Jerosare dsati onini. Najarodsapa Dio camitta tajari madijari. Nahidsa pocca dodosse tabaqqi memehuajicca huemahi queriquidsa Pohuadsa huahuatidsemana najari. ²³Jesodsa jehe quinajari memehuaji quequeriquimana najaridenihuaji tiajiressimanajaro. Diopa pohuadenidsa: –Occa madija, occa ejedeni tahidedenicca –najari. Pohuadeni oni Dio pocca papeodsa dsodo nani anijaro. Diodsa tiajiressimanajaropi huapimacca ima cattemade tojahijine. Madija bicaquiri najarideni

jicapojar corimedenidsa naqui tiajiressimanajaro. Dio Pohuajine pajiramanahissa tadsa Pohuahuaji madimanajari. ²⁴ICca ima tonanabicate Jesotohui tiajiressimanajaro. Pohuajinea Diocca jehe canireniji dsati iadsa tojajaro. Jeso pohua emenedsa naqui tiajiressimanajaro. Jeso itohui dsoqquedsa pohua emene toccajaropi icca ima tohuirenijine Diodsa huati tajaro: –Poccadeni imasiridsa epeje taji –najaro. Najaropi iadsa bica tajaro. Naraha Abeo emene toccajaropi najarossa nejerani. Imasiri inajicanijine pajira-gerani. Pohua emenepi: –Ohuaccone –najarora huati tajaro Diodsa.

Paji, Dio Atti tettajomananipi oppina tani

²⁵Nema nadsapi Dio tiadenidsa huati tadsapa timittamananissa taji. Pohua Atti tettajomana-geraji. Ajana maittaccadsama madimanageridenipa Moisesi pohuadenidsa Dio Atti huati huati tajariraha ettajomanadsapi Diocca najidsohue dsori tocanire-jarajari. Nema nadsapi Dio memehuaji iadsa huati naronadsa Atti ettajodsapi pocca najidsohue denima oppina tanicca dsori icanire-geranitohui. ²⁶Maittaccadsama ssono Sinahidsa Dio huati huati tajari Atti mohuini dacorajaroinipi nami dsadsa najaro quinade. Naraha jidapana Pohua Atti iadsa anijaropi ajima najaro: –Nidsa ojine nami dsadsa napomanitohui. Naraha nami dsadsa nani ojari-geranitohui.

Meme naqui ojine dsadsa nanitohui –nahi nade Dio Pohua Atti cacomerabote Ajeojine dsodo

nanidsa anijaro. ²⁷Aja Pohua Atti:
 –Ojine nami dsadsa napoma-
 nitohui –najaripa pocca nahatonaja
 meme, nami huapima aji jidapana
 qqui inanicca aniridsajaropi amossi-
 huajanitohui. Nadsapi Dio pocca
 cacahuehe ahuatora taniccana
 iadsa anidsanaponitohui. ²⁸Pocca
 cacahuehe iadsa inanaridsajaropi
 jicaquera tanitohui. Najarotohui
 Dio Puhuadsa etidsena. Puhuadsa:
 –Epeje, tijine bica tani –inana,
 onajaro. Puhuadsa icappinadsa
 icca madiema, ibodima Puhuadsa
 etidsedsa: –¡Bica tinani, deni tijani!
 –inana, onajaro. Nema inadsana
 Puhuadsa bica tajaro. ²⁹Diopa
 pina jororoni dacorajarossa najari.
 Tabaccorehe huapima inajicanissa
 tanitohui. Najarojine Puhuadsa:
 –Deni tijani –inajaro.

**Dio inahatidsehijine
 ajima inana**

13 ¹Jesodsa jehe quinajari-
 deni huapimapa timecote-
 deni. Najarideni tedseje tetideni
 cahanerara canajaropi tinebomana
 tejerana, onajaro. ²Ajjaro marinaja
 naqui tetideni ajimamana tejerana:
 Madija pohuadenidsa tinoccodeni
 jidsaqquri najari ticcadeni odsadsa
 bacco najonamanadsa pohuadeni-
 dsa bicaqquri tiquinaji. Puhua-
 denidsa: –Nija, jai tijedsimaji. Aja,
 tijipamanaji. Ajidsa ticahadija-
 nijine bica tani –titiquina nana,
 onajaro. Itesse ohuahadenipa nama
 nama quiquinanadsapa tahide ima
 ssamoqquri naraha Diocca dodosse
 tabaqqui memehuajicca naco pocca-
 deni odsadsa jai tojedsima tahi.

³Nadsama madija toponi cocoro-
 dsa domo huedsajaridenitohui

tibodideni huahuatoma-mana naji.
 Pina pohuadeni tedseje ocasserani
 tinahanamanajarossa tiquinaji.
 Madija nanajidso toquejenajarideni-
 tohui naqui tetideni ajimamana
 tejeraji. Nidsa dsotode tiadeni naqui
 pohuadenissa tiquinanijine nitide.

⁴Cajicajicca imapi Diodsa bica
 tani. Nema nadsapi maqquideje-
 deni amoneje ticajimanadsapi
 tecajirenissa taji. Amonejedeni
 maqquideje ticajimanadsapa
 tecajirenissa taji. Nebohuepi poni.
 Maqquidejedeni, amoneje ticaji-
 manadsapi ponira tinajarimanaji.
 Amonejedeni, maqquideje ticaji-
 manadsapa pohuara tinajarimanajo.
 Najaro marinaja tecahuamana-
 jeradsapi huananehe tinanamana-
 jaro. Huananehepi maqquideje
 amoneje cajiraha amoneje onihi
 aja ajapi poni. Amoneje maqqi-
 deje cajiraha maqquideje ohuaha
 naja najapi poni. Tabiradeni naco
 pohuama aja aja canaridserajaripa
 poni. Huananehe onihi, onihi naqui
 tinebomanaji. Nidsa dsotode Dio
 madija huapimacca ima cattemade
 tojadsapa huananehe cajimanajari-
 denidsa: –Ticcadeni ima tabaccora
 tani –nadsa inajidsobaqquihitohui.

⁵Dsiniro huemani ticajimanadsa
 timadimananijine tohuinira tibodi-
 deni huato tejeraji. Aji ticajimana-
 jarodsa: –Epeje, najarodsa imadini
 pajirani, bica tani –tiquinaji. Dio-
 tohuira denima tibodideni huato-
 manaji. Puhua Attipa: –Tia onebo-
 jerani. Tiadsa epeje onejeranitohui
 –nahi nade Puhua Atti dsodo
 nanidsa. ⁶Nema nadsapi ia naqui
 tamine Dabicca dsodonijidsa pajissa
 inadsa huati huati ihmmani najaro.
 Najaropi:

—Ohua Medsede ohua acco camajari. Ocappina-jerani-tohui.

¿Madijapa ohua tonatabaccora-manahijine pajiramanaco? Nohuerahi. Pajiramana-jarahi —nahi nade Dabi atti pocca jijiridsa anijaro.

⁷Tiadeni maridedenitohui tibodideni huahuatoma-mana naji.

Pohuadenipa Dio Attidsa tiadeni mari mari totocanabaquimana najari. Pohuadenipa ima bicanira inanamana-ridsadsapi poccadeni madie bica tade. Najaro poccadeni madie tetideni ajimamana-jeradsapi pina poccadeni jehenijissa nehe timadimanana, onajaro.

⁸Jesocristopa cacajiquimera-jarahitohui. Pohuapa maittaccadsama nama najonajaria jidapana naco nama najari. Nidsa dsotode naco nama dsanapohuitohui. ⁹Nadsapi marinaja pina Jeso tahimarissa nejeranicca timittamanadsapi najarodsa pajissa tiquinejeraji. Marinaja jidsa tanicca anidsa naqui: —Imittana —tiquinejeraji. Tibodideni Diodsa jehe tiquinani todacorani nanijinepi Dio iadsa huati cahanari canahi tahimarina paji. Najarona ibodi tobicanijine pajirani. Naraha marinaja onihii pina: —Ajajari jijipapa tijipamana tejeraji, oppina tahi —quiquina-najaricca marinajapi tibodideni tobicanijine pajira-jerani.

¹⁰Maittaccadsamacca Diodsa dada toqqimadedenipa Dio anihihuaji denima bica tanicca quiquinanahihuaji bani emene dsojo dsojo ihicadsimamana najaro, poccadeni madijacca imasiri manaconi. Naraha jidapana icca imasiri

manaconipi Jeso emene toccajarona paji. Najaropi aja dada toqqimadedenidsa nohuerani. Pohuadenipa najaro Jesocca daniji iadsama cajimana-jarahi. ¹¹Maittaccadsama poccadeni imasiri manaconi bani emenepa Diodsa dada toqqimadedeni tojahiccana Dio anihihuaji denima bica tanicca quiquinanahihuaji dsojo dsojo ihicadsimamana najaro. Naraha assirepa pohuadeni madimanahi amossinihuaji dsojo ininemanadsa botta botta quiquinanajari. ¹²Dsotode naqui pina najarossa inanamanajaro. Jeso naco odsa panani Jerosare amossinihuaji iaququenamanadsa ahua porimacossanidsa coba idsanamanadsa ocasserani ahujari. Pohua emene toccajaropi madija pohuadsa toquejenajari imarideni inahirejaro. ¹³Jari, ia naqui Jeso tedseje odsa panani amossinihuaji jaijenana. Ia naqui pina pohua ocasserani ahujarissa najaro inahanana. ¹⁴Ajjijaro namidsapi odsa panani anidsanaponijinecca icappirani. Jina, memehujicca odsa panani jicaquera tanicca tohuira jajjana. Nani bacco inanijine dissaraqquiri inana. ¹⁵Nadsapi: —Jesocca iquejenajaro —inadsapi huajjiradsa Diodsa ehetidse nana. —Jehe Abi Dio, epejeni. Tijine bica tani —idsanapona, onajaro. Najaropi icca daniji Diodsa bica tajaro. ¹⁶Ajjijaro naqui tetideni ajimamana tejeraji: Ima bicanira tinanamandananapoji. Ticajimananicca mota naqui cappiramanajaridenidsa da da titiquina naji. Najaro icca danijipi Diodsa bica tani. Pina maittaccadsama Dio inahatidsemanahijine bani da da quiquinanajarissa najaro.

¹⁷Tiadeni maridedeni attidenidsa iboraqquiri tiquinaji. Pohuadenipa tiadeni cacahuade jassi quina-jarahi. Pohuadenipa ajijaro ima nahatoqquiri napojari: Nidsa dsotode Dio baccohuaji idomo huadsa poccadeni cacahuaniji tahimarini Diodsa ecomeramananitohui. Nema nadsapi pohuadenidsa tijinedeni bica tadsapi huatidsemanahitohui. Naraha pohuadeni oji tinanabaquimanadsa tiadeni cacahuade tonacassera-manadsapa ima bicani dsori ticanirenitohui.

¹⁸Itohui Diodsa huati huati titiquina naji. Iapi ibodidsa ima nohuerani nahatoqquiri inani. Imadinissa dsanaponijine disseraqqquiri inajaro. ¹⁹Tiadeni qquide ocanajorani-pomanijine tohuini onadsa Diodsa huati huati tiquinaji, onajaro, denima onajo-jeranjine.

Occa dsodoniji jicanicca

²⁰Jonehe jinede Diopa Pohua Bedi ia Medsede Jeso dsoque-
raha Pohuajine nahatonijari.
Jesopa edede cacahuade bicahi.
Iapi pocca edede iquejenajaro ia
tohuacahua-baqqquijari. Pohua
emene toccajarojine Dio pocca jehe
canireniji dsati jiquejeranicca iadsa
inahatojaro. ²¹Najari Dio Pohuana
tiadeni tonapajira-baqqquihissa

tana, ticcadeni ima huapima naqui
inabicanissa tana, nani Pohua
jipa tahicca tinanamana-dsanapo-
nijine, onajaro. Dio pocca madija
bicaqquiri inanijine ia tonadacora-
baquina, onajaro. Jesocristo
pocca iquejenadsapi Dio iadsa
nema inanadsanaponitohui. Pohua-
dsa: –¡Bica tinani, deni tijani!
–ihidsanapo nana, onajaro. Pajissa
nema nana.

²²Jehe ohuemecotedeni, ajijaro
ima teppe tiadenidsa dsodo
onajaropi ticcadeni jeheniji
todacorani nanijine. Aji ojine dsodo
nanipi huapi tejerani. Pamema
nani. Najaro hua tiquinanissa taji.
–Hua nani najo tani –tiquinejeraji.

²³Imecote Timoteocca ima
nahatoqquiri tiquinanijine naqui
tiadenidsa dsodo onajaro. Jidapapa
toponi cocorodsa qquenajari.
Huassinaja bacco nanidsapa nahi
tiadenihuaji ohuadsa toccahitohui.
Naraha bacco nani-jaradsapa ohua
motta nani occanitohui.

²⁴Tiadeni maridedeni huapimadsa
nija onajaro. Jesodsa jehe quina-
jarideni huapimadsa naqui nija
onajaro. Dsama Itariacca madija
naco tiadenidsa nija quinajari.

²⁵Dio tiadenidsa ima bicani
inanadsanapona, onajaro.
Epejeni occa ima.